




LHUKONZO

LOWER PRIMARY CLASSES

RADIO SCRIPTS

EBYERYIGHA OKO REDIYO EBY'EBITHUMBI EBYAHISI
EBY'AMATHENDEKERO AW'OMUSINGYI



AMASOMO W'ERILHABYA OKO REDIYO

AMASOMO akendithwalha dakika 30. Hali endambi y'eriyithekatheka, ebikakolhawa büsana n'erihuhahuhania abathendekwa n'emibiri y'erikolha omo bitabü.

Ebibüya ebiri okwikolesya omulenge/erediyo n'evidiyo omwisomesya, ebi byanganawathikya eryigha omo mibere eyikanganibwe ahikwa.

- Kyikalethaho emisomeserye muthina-muthina eyikawathikaya eryigha
- Kyikahereraya omukangirirya y'omulenge- ekyi kyanganakehya omundu eriwoya iniali iyowene amabya iniakasomesaya abiyi abathe hakuhi, kandi ibbwa kyikathasyawathikaya abiyi eriyowa ibane bughuma kutse hakuhi n'omukangirirya
- Kyanganakolesibwa eryolhobya n'erikengesia ndeke ebitsibu ebikalhakilire
- Kyanganawathikya abiyi eribana lhuba ebindu by'erikolesya omwigha
- Kyikawathikaya abiyi eryigha oko buthuku bwabu ibanayithondwerye, ihane eribya amasomo inianganathasyasubwamo, kandi ihane eryimania kutse eriluhuka
- Kyikakehaya ebibulyo binene erilhwa omo biyi ebyangasa buli ndambi
- Kyanganathasyakolesibwa **oko yindi ndambi**

ABANDU ABASAMALIRWE

EBITHUMBI EBYAHISI EBYERITHENDEKERU LY'OMUSINGYI

Ekyikulhu ekyeryibuka: Amasomo aya akendikolhwa ndeke amasomesibwa nga hane bandu babiri abakakanaya, kyamabya isikyangothokokana wukolesaye omulenge w'omundu mughuma aliriryo iwunemuhindulha omulenge oko ndambi y'eribulya ekyibulyo ekyikasonda erisubwamo.

EMITHWE N'EHITHWE EBIKENDISOMWA

S/N	EMITHWE (themes)	EHITHWE (sub- themes)
1	EKA N'OBULHAMBU BWETHU	Abandu abali eka Olhukwamirwa n'emibiri y'abandu abali eka Ebindu ebikasangawa eka n'emibiri yabyo

		Abandu abali omo bulhambu bwethu
2	OMUBIRI W'OMUNDU N'AMAGHALHA	I. Obuyongyo bw'omundu n'obuyitsotse II. Amalhwere awakabanika kutsibu n'emibere y'eriyirinda kughu III. Amalhwere w'omonda awakasighalira IV. Ebihuka ebikaheka amalhwere
3	EBYALYA N'EKYIRISYA	i. Emihanda y'ebyalya ii. Erirya eryowene iii. Ebitsibu ebikalhwa omwiryana nabi iv. Amena w'ebyalya n'ahabikalhwa
4	Ebithuthimbireku n'emibere y'obuthuku	i. Ebikakolha obuthuku n'emithina y'obuthuku ii. Emibiri eyikakolhawa omo buthuku muthina-muthina iii. Ebitsibu ebikalethawa n'obuthuku n'ebyangakolhwa oko buthuku iv. Ebisoro, ebinyonyi n'ebihuka ebikabanika kutsibu

EKA YETHU N’OBULHAMBU BWETHU

ABANDU ABALI EKA

ERISOMA N’ERISAKANGA

Omwatsi: (Ekyi kyanganasathwa erisomo lithe lyatsuka, oghundi mundu anganakyikolha butsira omukangirirya musa)

Abathendekwa, amathendekeru aghosi anakyingire, hathya mukasomera eka erilhaba oko rediyo busana n’obulhwere obukahamba abandu banene obukahulhawa mwa korona.

Obulhwere obu bune omo Yuganda neryo thutholere ithwayirinda. Obulhwere obu bwanganalwa oko mundu ibwasighalira oghundi wamabya hakuhi n’abandu abakakoholha kutse erithwa esyotsihya kandi ibanalhwere. Erihamba oko bunu bwawu, amesu, n’enindu ebyalha ibinakyinire.

Obuthuku: dakika 30

<p>EKYERITSUKA NAKYO Dakika 2</p>	<p>Wabukire mwanithu muthendekwa! Wasingya erihulikirira erisomo lino ery’erisoma n’erisakanga Erina lyayi n’ingye Thuthalithwatsuka, ngasaba indi thuyithegheke erihulikirira. Wimaye ekalamu y’erikalha kutse ey’obwino n’ekyitabu ky’erisakangamu. Wubane ah’eryikalha. Isiwikalha hakuhi n’oghundi mundu. Ngalengekanaya wamabiriyithegheka.</p>
<p>ERIDARA 1: Dakika 5</p>	<p>Munabwire, thukayakanaya oko “ABANDU B’EKA” Eritsuka, eka kyikamanyisaya kyi? Oh! H’aha thwikere ng’abandu b’erihika lighuma. Ni bandu bahi abakabya eka? Wuthe wasuba omo kyibulyo, leka ngakwimbire olhwimbu: Wuhulikirire: WIMBE: Thatha, mama, mughalha wethu, mwali wethu! Mughalha wethu mwali wethu, mughalha wethu mwali wethu, Thatha, mama, mughalha wethu, mwali wethu</p>

	<p>Mukaka, nyokolhume, na songali Tala lalalala! X 3</p> <p>Hathya wimbe nayi: Thatha, mama, mughalha wethu, mwali wethu! Kyowene.</p> <p>-Ni bandu bayi abakabya eka abathwamowa omo lhwimbu? Ni: Thatha, mama, mughalha wethu, mwali wethu, mukaka, nyokolhume, songali</p> <p>- Ni bandu bahi abali eka wenyu? Ngikere na thatha na mama basa, Kandi ibbwa iwe? WUBYE NGAWUKAKANAYA N'OMUNDU: sokulhu, mukaka, na mughalha wethu na mwali wethu oooh!</p> <p>Wasingya! Ibbwa ni bandu bahi abakasangawa eka? Omo maka amaghuma muli thatha, mama n'abana babu basa. Omo maka awandi muli thatha, mama, abana n'abanyalughanda abandi nga songali na nyokolhume. Eka eyi yiri mw'abandu muthina-muthina. Thulhuhuke ithunemuyitheghekerera erisoma.</p>
<p>ERIDARA 2 Dakika 7</p>	<p>- Abathendekwa mwasingya erilhwa omwilhuhuka!</p> <p>Hathya thukayigha erisoma. Thutsuke eryimba olhwimbu lhwethu lhw'erisoma</p> <p>WIMBE Ni saha y'erisoma, ni saha y'erisoma, Ithwe bosu haghuma, ni saha y'erisoma.</p> <p>Thwimbe haghuma. MWIMBE Ni saha Mwasingya.</p> <p>Hathya muhulikirire ndeke ingabasomera ebinywa: Wusome buli kyinywa iwunemuwatha ebyambana ebikyikolire. Wuwathikaye abiyi erighanza ebyambana by'esyonzakanu. Wusombole ekyinywa ekyiwithe omulenge kutse emirenge eyawukasonda erikangirirya</p> <p>songali somukulhu sokulhu nyokolhume omulhume somulere</p> <p>- Thusombole ekyinywa kyighuma: songali, kyikatsuka n'omulenge s na o erisisoma /so/ Hane ebindi binywa by'Olhukonzo ebikatsuka na so eky'erilhangiriraku sondaya, songaya, sombe., Hereraya ebindi binywa 3 nayi inganemulengekania ekyayi. Imanaya kake: Wamabana binywa byahi? Bisome omo mulenge owakowika. sobyalha, soka, somulere Kyuwene!</p> <p>Thukolesaye ebinywa byethu omo milhondo:</p>

	<p>songali somukulhu sokulhu sobyalha, omulhume somulere</p> <p>Ekyerilhangirirako thuthatsuka n'ekyinywa songali: Songali wayi ni mukali muli.</p> <p>Nawu kolha owaghu mulhondo: WUBYE NGAWUKAKANAYA N'OMUNDU. Nyibwire omulhondo wawu. Songali wayi asi erilhuka ebibu.</p> <p>N'ebindi kuwunabikole wuthya: somukulhu sokulhu sobyalha omulhume somulere</p> <p>Abathendekwa bayi babuya mwasingya! Thulhuhuke kake ithunemuyithegheka erihulikirira omughane.</p>
<p>ERIDARA 3: Dakika 8</p>	<p>Hathya ngayabasomera omughane. Ngendibya inabirisoma, ngendibabulya ebibulyo. Muyithegheke. Mwikale ndeke, mulekisakanga kyindu kyosi-kyosi, mukwamihulikirira.</p> <p>Wuhumule kake. Weraye omumeru! Wusome omughane kabiri</p> <hr/> <p>EKA EYIRI MW'OBUTSEME</p> <p>Kabugho ikere omo bulhambu bw'eKolenge. Ikere n'ababuthi biwe. Awithe baghalha babu babiri na mwali wabu olhumekeke. Bikere eka na mukaka wabu. Obuli igholhogholho mukaka akababwira esyonganu esya kerakera. Obuli mundu wosi eka anzire mukaka n'esyonganu siwe esilhumire.</p> <p>Hathya suba omo bibulyo bino</p> <ol style="list-style-type: none"> 1. Kabugho ikere hayi? Lhuhuka kake 2. Kabugho awithe baghalha babu bangahi? Lhuhuka kake 3. Busana na kyi abandu abali ewabu Kabugho banzire mukaka? Lhuhuka kake 4. Kuwabya iniwe Kabugho wangakolere mukaka ya kyi erikangania indi wumwanzire? Lhuhuka kake <p>Let us check whether we have correct answers:</p> <p>Thulebaye ngathwanamasubamu ndeke: WUTHASYASOMA OBULI KYIBULYO ENGENDU YA KABIRI NERYO WUHERERAYE ERISUBAMU ERIHIKIRE.</p> <p>Ekyibulyo kyethu ky'erimbere kyilhwe: Kabugho ikere hayi? Erisubamo: Kabugho ikere omo bulhambu bw'eKalonge. Kyowene kutsibu, ni bangahi omwinywe abamakyihika, musumbe ebyalha, muyibbandire omo byalha, mwasingya. Wuhereraye oghundi mubiri w'erikolha: Omo ndambi yenyu y'eriluhuka mukendisatha imunemukangania abandu b'eka ngokubasosire n'ebyabakakolha.</p> <p>-Muleke thulhuhuke kake ithunemuyitheghekera erisakanga. Isiwibirirawa ekalamu n'ekyitabu</p>

<p>Dakika 5</p>	<p>Mwasingya erisubulha! Ni saha y’eryigha erisakanga. Ngalengekanaya wunahambire ekalamu yawu n’ekyitabu.</p> <p>Wuthe wasakanga thwimbe haghuma olhwimbu olhukakanganaya erisakanga. WIMBE: Ni ndambi y’erisakanga! Sakanga enzakanu: m mm Hathya sakanga: a aa</p> <p>Sakanga ekyambana ky’esyonzakanu: ma ma</p> <p>- Hathya sakanga ebinywa:</p> <p>WUSOME OBULI KYINYWA NDEKE MIRUNDI IBIRI! WULHUHUKA KAKE NERYO WUBUGHE ESYONZAKANU ESIKOLIRE EKYINYWA EKYO NGUMA NGUMA</p> <p>mama mwaliwethu thatha mughalhawethu</p> <p>Sakanga omulhondo owali mw’ekyinywa mama: SOMA OMULHONDO NDEKE</p> <p>Mama ni mukali munene. Wasingya</p> <p>Omo ndambi yawu y’eriluhuka wukendisakanga omulhondo oku buli mundu oyuli eka. Kandi wukendithera ebisosano, ekya thatha, mughalhawethu, mwaliwethu</p> <p>Omwisomo lino, thwabirikania oko bandu abali eka. Omwisomo lyethu erikasa thukendisyabya n’ebindi by’erikaniako oko bandu abali eka. Wamathoka wusyasa n’ekyisosanu ekyiri kw’abandu abali eka wamabya iwunakyiwithe</p>
<p>Dakika 1</p>	<p>Ithukawunzerera erisomo lyethu wibukaye abandu abawikere nabu eka ERINABA OKO BYALHA ERIBIHENIA OMO MAGHETSE N’ESABBUNI OBULI NDAMBI OMUBIRI WAWU IKALE INIANAHEENIRYE BUTHUKU BOSI. WUBYE EKA WIKALE IWUNE NDEKE BUKYAYI</p>

Abandu abali eka ERIGHANZA

Omwatsi mukulhu:

Abathendekwa babuya, muligholho muthukanakania okwinaba oko byalha n'esabbuni n'amaghetse habwa sekendi 20 kusangwa ekyi kyikendibalinda n'eririnda abandu abali eka erithendihambwa n'amalhwere ng'ekorona. Omo syodakika sike bara iwunemukolesya eminwe yawu ngawamathanaba oko byalha mirundi mingahi munabwire, wunayitheghekire, tsuka Mwasingya

Obuthuku: Dakika 30

Ekyeritsuka nakyo Dakika 1	WABUKIRE muthendekwa mubuya! Ngakuthangirira omwisomo lyethu y'erighanza eryamunabwire Erina lyayi ningye Thuthethwatsuka, Ngasaba indi thuyithegheke erikwama erisomo. Mwimaye ehithi ehyathukabara, ekalamu y'omuthi kutse ekalamu y'obwino n'ekyitabu ky'erisakangamo. Wubane ah'eryikalha. Wibuke erithendyikalha hakuhi n'oghundi mundu. Ngalengekanaya wamabiriyithegheka.
Eridara 1 Dakika 5	Omwisomo lyethu munabwire, thukyinasamalira abandu abakasanganawa eka. Thukayigha eribabara n'eribahambania mwa bakebake.. Thuthalithwatsuka, thwimbe olhwimbo lhw'erighanza kutse eribara: Muhulikirire ingimba. WIMBE Kathunasi eribara, eribara lyolhobire,nguma, ibiri, isathu, ini, ithanu, mukagha, musangyu x 2

	<p>Nguma, ibiri, isathu, hulhuka nayi Thubare ehithi hyethu 1,2,3,4,5,6,7,8,9,10</p>
<p>Eridara 2 Dakika 8</p>	<p>MUHULIKIRIRE, eka wethu yiri mukaka, mughalhawethu, mwaliwethu, nayi. Leka ngabaghanze 1,2,3,4</p> <p>Ni bandu bahi abali eka wenyu? Baghanze</p> <p>WUBYE NGA HALI OMUNDU OYUKAKUBWIRA; ingye, mukaka, thatha, mama, mughalhawethu, na mwaliwethu Thubaghanze thwangasamalira 1,2,3,4,5,6</p> <p>Thubahambanaye abalhume n’abakali Abalhume ni bahi? Leka ngasamalire thatha na mughalhawethu. Ni bangahi? Ghanza 1,2</p> <p>Abakali ni bahi? Mama, mukaka, mwaliwethu, ingye Ghanza 1,2,3,4 Hathya samalira abandu abali eka wenyu; Ni bangahi? Abosi baghanze.</p> <p>Ghanza abalhume. Hathya ghanza abakali. Wasingya. Wamabirighanza abandu abali eka wenyu n’eribatheka haghuma ngokubasosire.</p> <p>Mwasingya! Thulhuhuke kake ithunemuyithegheka busana n’oghundi mubiri. Wibuke ehithi hyaghu hy’erighanza.</p>
<p>Eridara 3 Dakika 8</p>	<p>Mwasingya erisubulha. Thukayasondaya esyonamba esithemu ithunemughanza, ibbwa aliriryo thutsike eryimba olhwimbu lhwethu lhw’eribara.</p> <p>Kathunasi eribara, eribara lyolhobire,nguma, ibiri, isathu, ini, ithanu, mukagha, musangyu x 2 Nguma, ibiri, isathu, hulhuka nayi</p> <p>Mubare nayi. Thubare ehithi hyethu/ ehibwe 1,2,3,4,5,6,7,8,9,10,11,12,13,14,15,16,17,18,19,20</p> <p>Ni namba yahi eyibulire? Hulikirira</p> <p>a) 1, 2, 3, ____, 5, 6, 7 b) 3, 4, 5, 6, ____, 8, 9, 10 c) 10, 11, 12, ____, 14, 15, 16</p>

	<p>d) 8, 9, 10, 13, 14, 15, 16, ____, 18, 19, 20</p> <p>e) 11, 12, 13, 4, 15, ____, 17, 18, 19, 20</p> <p>Thulhuhuke kake ithunemuyitheghekera ebikakwamako</p>
<p>Eridara 4</p> <p>Dakika 8</p>	<p>Thukayahulikirira erisamalira amaka muthinamuthina. Wukayasuba omo bibulyo ebihambire oko maka ayo</p> <p>1. Eka ya Kato muli sokulhu, mama, mwaliwabu na kato. Aba ni bandu bangahi? Abalhume ni bahayi? Abakali ni bahayi?</p> <p>2. Isebahasa ikere na Nyabahasa. (Bawithe abahasa, abosi ni bambesa)</p> <p>a) Ni bahayi omwibo abakali?</p> <p>b) Abakali ni bangahi?</p> <p>c) Ni bahayi omwibo abalhume?</p> <p>d) Abalhume ni bangahi?</p> <p>e) Ni bandu bangahi abali eka wa Isebahasa abosi haghuma?</p> <p>Omo bikuhi thwamabirighanza n'erihambania haghuma abandu abali eka Omwisomo lyethu erikasa thukendikania oko mibiri muthinamuthina n'olhukwamirwa lhw'abandu abali eka.</p>
<p>Eridara 5</p> <p>Eriluma</p>	<p>Ithukawunzerera erisomo lyethu wibukaye abandu abawikere nabu eka</p> <p>ERINABA OKO BYALHA ERIBIHENIA OMO MAGHETSE</p> <p>N'ESABBUNI OBULI NDAMBI</p> <p>OMUBIRI WAWU IKALE INIANAHENIRYE BUTHUKU BOSI.</p> <p>WUBYE EKA WIKALE IWUNE NDEKE</p> <p>BUKYAYI</p>

EMIBIRI N’OLHUKWAMIRWA LHW’ABANDU ABALI EKA

ERISOMA N’ERISAKANGA

Omwatsi muhyamuhyu:

Abathendekwa babuya, hathya mukasomera oko rediyo kusangwa ni bughabe bwenyu erisomesibwa. Obughabe ni kyindu ekyobuli mundu wosi atholere iniathunga, nomohangabya ihalikiyi! Wubye muthabana kutse mumbesa, mundu mukulhu kutse mwana, Musilamu kutse Mukurisitayo, obuli mundu atholere iniathunga bindu birebe ng’ebyalya, amaghetse n’aheryikalha. Kandi muwithe emibiri eyamutholere erikolha ng’eririnda ebyobuhangwa erilhaba omwiwania ahamwikere eka. Obuthuku: Dakika 30

<p>EKYERITSUKA NAKYO Dakika 2</p>	<p>Wabukire muthendekwa mubuya! Wasingya eryasa omwisomo lino eryerisoma. Erina lyayi ningye Thuthalithwatsuka, ngasaba indi thuyithegheke erihulikirira. Wimaye ekalamu y’erikalha kutse ey’obwino n’ekyitabu ky’erisakangamu. Wubane ah’eryikalha. Wibuke eryikalha hali oko ghundi mundu. Ngalengekanaya wamabiriyithegheka.</p>
<p>ERIDARA 1: Dakika 8</p>	<p>Omwisomo lyethu ly’erisoma n’erisakanga eryathwakolha, muthukanasamalira abandu muthina-muthina abali eka. Wukyinabibukire? Ni bahi? WUBYE NGAWUKAKANAYA N’OMUNDU MULEBE Wulhuhuke kake, ni thatha, mama,</p>

mughalhawethu, mwaliwethu, mukaka, sokulhu n'abandi banyalughanda?

- Munabwire, thukayakanaya oko "MIBIRI N'OLHUKWAMIRWA LHW'ABANDU MUTHINA-MUTHINA ABALI EKA"

Eritsuka. Emibiri n'olhukwamirwa kyikamanyisaya kyi? Emibiri n'olhukwamirwa by'ebindu ebyathutholere erikolha eka.

- Eka wenyu abandu bawithe mibiri yahi? Oyukatsumba ebyalya ni ndi? Oyukayatheha amaghetse ni ndi? Oyukayasenya esyongwe ni ndi? Iwe eka wukakolha mubiri wahi?

- Omo maka awosi, abandu abosi bawithe emibiri n'olhukwamirwa ebyabatholere erikolha kandi omubiri owabuli mundu akakolha ni mukulhu okwithwe abosi eryikalha haghuma ithunatsemire. Thotholere ithwasima abandu abali eka busana n'emibiri eyabakathukolera

Muleke ngababwire olughanu olhukakanganaya ekyabanika eka ewa Mbithi.

WUTHULE OLHUGHANU NDEKE NGALHUKALHWA OMO MUTHWE WAWU BUTSIRA ERILHUSOMA

Kera, habya iya Wambithi, mukali wiwe n'ekyana kyabu. Eka eyi yabya yikere omo musithu hakuhi n'omusike w'olhusi. Obuli kyiro Wambithi iniakayasoha amahere. Mukali wiwe iniakasighalha eka akatsumba, eryoya n'erisya ende n'omwana wabu. Kyiro kyighuma Wambithi mwabugha isyatsemire athi iyo akakolha mubiri munene kandi mukali wiwe inianemukolha mubiri muke. Mwathwamu erihingisya emibiri.

Obuthuku bwabere bukakya Mukali wa Wambithi mwayasoha amahere. Wambithi mwasighalha eka n'omwana n'ende. Mwatsema.

Mwatsumba ekyengyakya inianemusughunda. "Ha! Ha! Ha!

Munabwire ni kyiro kyayi," mwabugha inianemulya. Abere inianemulya, omwana wabu mwabuka neryo amalira. Omwana abya iniabirikyina kandi iniabirikwa enzalha! Wambithi abya isyalyakama ende. Ende nayo muyatsuka erimolholhoka. Yabya iyikasonda erirya ebithi.

Mwahererya omwana oko byalya biwe neryo mwahanga ende oko lhuthwe lhw'enyumba yamalya ebithi ebyabya biswikire nyumba. Omwana mwalira kutsibu kusangwa omo byalya mwabya epiripiri nene. Ende muyahurungana omo lhuthwe lhw'enyumba, muyaleremba

	<p>yamasindiholha. Omukali abere akasubulha inianahekire amahere mwasweka akalhangira ebindu ebyosi ibyabiribya kyithyakyithya.</p> <p>Ni kyahi ekyawamigha omo lhughanu olhu?</p> <p>WUBYE NGAWUWITHE OYOWUKAKANAYA NAYO Mwasingya! Thulhuhuke kake ithunemuyithegheka erisoma</p>
<p>ERIDARA 2: Dakika 7</p>	<p>Wasingya erisubulha mwanithu muthendekwa!</p> <p>WIMBE Ni saha y'erisoma, ni saha y'erisoma, Ithwe bosu haghuma, ni saha y'erisoma.</p> <p>Thwimbe haghuma. MWIMBE Ni saha Mwasingya.</p> <p>- Hathya muhulikirire ndeke ingabasomera ebinywa binu: eribirya erisenya eritumba eririsa eririma</p> <p>Wusome obuli kyinywa iwunemukiwatha. Wuwathikaye abiyi erighanza ebyambana by'esyonzakanu. Sombolha ekyinywa kyighuma ekyiri mw'omulenge owawukasonda eritheka kw'akaghalha.</p> <p>- Thwimaye kyinywa kyighuma: eritumba, kyikatsuka n'omulenge e kandi kyinawithe n'omulenge r Hane ebindi binywa by'Olhukonzo ebikatsuka na e kandi ibinawithe r ekyerilhangirirako erimera, erisatha, erihera. Sondekanaya ebindi binywa 3 nayi inganemusakanga ebyayi. Imanaya kake: Ebyawu binywa ni byahi? Bisome omo mulenge owakowika. erimera, eriheka, eritheha Wamathoka!</p> <p>- Thukole (emilhondo) esyosentesi ithunemukolesya ebinywa byethu: biraya senya tumba lisaya lima</p> <p>Ekyerilhangirirako thuthatsuka n'ekyinywa biraya: Muhindu akabiraya obuthalha.</p> <p>Nawu kolha owawu mulhondo. WUBYE NGAWUWITHE EYAWUKAKANYA NAYO. Nyibwirwe omulhondo wawu. Kabughu akasenya esyongwe. Wamathoka. Wasingya.</p>
<p>Eridara 3: Dakika 7</p>	<p>- Hathya ngayabasomera omughane. Ngendibya inabirisoma, Ngendibabulya ebibulyo. Muyithegheke. Mwikale ndeke, simuhandike kyindu kyosi, muhulikirire.</p>

	<p>Kasereka ikere eMuyina. Ikere na mukali wiwe iya Bira n’omwana wabu w’obukali iya Masika. Obuli ngyakya, Kasereka akayalisaya esyombene hakuhi n’olhusi. Bira akatumba n’eryuwania obuthalha. Masika akoghaya ebindu. Kyiro kyighuma, Kasereka abere akahanga embene y’oko muthi, mwakobboka neryo mwayithinira. Bira mwasa akathibitha. Mwamuhangania. Mwahanga esyombene esindi esya Kasereka abya isyalyahanga. Kasereka mwatsema busana na Bira erisyamuwathikya.</p> <p>Hathya suba omo bibulyo bino</p> <ol style="list-style-type: none"> 1. Kasereka ikere hayi? Lhuhuka kake 2. Mukali wa Kasereka akakolha kyi? Lhuhuka kake 3. Busana na kyi Bira mwayawathikya Kasereka erihanga embene? Lhuhuka kake 4. Kuwabya iniwe Kasereka wangahererye Bira yakyi wukamusima busana n’erisyakuwathikya? Lhuhuka kake <p>Thulebaye ngathwanamasubamu ndeke:</p> <p>THASYASOMA EBIBULYO ENGENDO YAKABIRI IWUNEMUHERERYA ERISUBAMO ERIHIKIRE Ekyibulyo kyethu kyerimbere kyilhwe: Kasereka ikere hayi Erisubamo: Kasereka ikere eMuyina.</p> <p>Kyowene kutsibu, ni bangahi omwinywe abamakyihika, musumbe ebyalha, muyibbandire omo byalha, mwasingya. Wuhereraye oghundi mubiri w’erikolha: Omo ndambi yenyu y’eriluhuka mukendisorokya ebisosano by’abandu abakakolha emibiri muthina-muthina. Wanganabimathika haghuma neryo iwakolha ekyitabu kyawu ky’ebisosano.</p> <p>-Muleke thulhuhuke kake ithunemuyitheghekera erisakanga. Isiwibirirawa ekalamu n’ekyitabu</p> <p>.....</p>
<p>Dakika 5</p>	<p>Wasingya erisubulha! Ni saha y’eryigha erisakanga. Ngalengekanaya wunayitheghekire n’ekalamu n’ekyitabu. Muthe mwatsuka erisakanga, thwimbe haghuma olhwimbo lhwerisakanga. Wimbe: Ni saha y’erisakanga! - Sakanga enzakano e e Hathya sakanga: r r</p>

	<p>Sakanga ebinywa: erisaba eriseka</p> <p>Hathya sakanga ebinywa:</p> <p>WUBUGHE EKYINYWA KABIRI OMO MULENGE MUNENE</p> <p>NERYO WUBUGHE ESYONZAKANO ESIKOLIRE</p> <p>EKYINYWA EKYO</p> <p>heka sesa eribirya eririma</p> <ul style="list-style-type: none"> - Thusakange esyosentesi (emilhondo) ithunemukolesya ekyinywa heka - Mama akaheka omwana. SOMA OMULHONDO NDEKE MIRUNDI IBIRI <p>Mwasingya</p> <p>Omo ndambi yenyu y'eriluhuka mukendithera ebisosano by'abandu abali eka ibanemukolha emibiri muthina-muthina. Mukendisakanga ekyinywa kutse omulhondo oku buli kyisosano.</p> <p>Omwisomo lino, thwamakania oko mibiri n'olhukwamirwa lhw'abandu muthina-muthina abali eka. Omwisomo lyethu erikasa, thukendisyakania oko bindu ebiri eka. Mutheketheke ebisosano kutse ebindu eby'erisakaniako.</p>
Dakika 1	<p>Ithukawunzerera erisomo lyethu wibukaye abandu abawikere nabu eka</p> <p>ERINABA OKO BYALHA ERIBIHENIA OMO MAGHETSE</p> <p>N'ESABBUNI OBULI NDAMBI</p> <p>OMUBIRI WAWU IKALE INIANAHENIRYE BUTHUKU BOSI.</p> <p>WUBYE EKA WIKALE IWUNE NDEKE</p> <p>BUKYAYI</p>

EMIBIRI N’OLHUKWAMIRWA LHW’ABANDU MUTHINA-MUTHINA ABIKERE EKA.

ERIGHANZA

Omwatsi mukulhu w’eriminya:

Abathendekwa babuya, eriminya erighanza n’erisakanga kyikathuwathikaya eriminya nga ni bandu bangahi abalhwere ekorona. Thwanganaghanza n’ebindi bindu binene n’abandu omo buying bwethu buli kyiro, ekyerilhangirirako, esyonamba 1 erihika 10, amanyumba, esyombene, esyonde, esyombwa, ebithumbi, esyobbasi, esyopikyipiki, ebitabu n’esyondege.

OBUTHUKU dakika 30

<p>Ekyeritsuka nakyo Dakika 1</p>	<p>WABUKIRE muthendekwa mubuya! Ngakuthangirira omwisomo lyethu y’erighanza eryamunabwire</p> <p>Erina lyayi ningye Thuthethwatsuka, Ngasaba indi thuyithegheke erikwama erisomo. Mwimaye ehithi ehathukabara, ekalamu y’omuthi kutse ekalamu y’obwino n’ekyitabu ky’erisakangamo. Wubane ah’eryikalha. Wibuke erithendyikalha hakuhi n’oghundi mundu. Ngalengekanaya wamabiriyithegheka</p>
<p>Step 1 5 minutes Eridara 1 Dakika 5</p>	<p>Omwisomo lyethu munabwire, thukayigha erighanza n’erisakanga esyonamba omo binywa.</p> <p>Thuthethwatsuka, thwimbe olhwimbu lhwethu lhwerrighanza.</p> <p>WIMBE</p> <p>Nguma, ibiri, boha engetha yayi,</p> <p>Isathu, ini, kyinga olhuyi</p> <p>Ithanu, mukagha, imaya ehithi</p>

	<p>Musangyu, munani, hitereke oko meza</p> <p>Mwenda, ikumi, engundu y'engokolhume</p> <p>Imaya ehithi hyaghu hy'erighanza neryo thwighe eribara</p> <p>BARA OMO MULENGE MUNENE</p> <p>1,2,3,4,5,6,7,8,9,10 Wasingya</p>
<p>Eridara 2</p> <p>Dakika 10</p>	<p>Hathya thukayasakanga esyonamba omo binywa:</p> <p>Bara ehithi hithanu BARA OMO MULENGE MUNENE 1 2 3</p> <p>4 5</p> <p>Hathya thimbaya amesu w'eka wanaghanza abandu abali hakuhi nawu.</p> <p>Ni bandu bangahi abawamalhangira? Bakakolha kyi?</p> <p>Bakalima? Bakoghaya? Bakatsumba? Ni bandu bangahi aba.....?</p> <p>Kyowene</p> <p>Imaya akathi kaghuma wanabugha nayi NGUMA NGUMA NGUMA</p> <p>Thubughe esyonzakano esiri omo kyinywa nguma NG-U-M-A</p> <p>Ekyinywa ni nguma</p> <p>Sakanga enamba 1 n'ekyinywa nguma Lhuhuka kake</p> <p>Imaya ehithi hibiri wanabugha nayi IBIRI IBIRI IBIRI</p> <p>Thuthabugha esyonzakano esiri omo kyinywa ibiri I-B-I-R-I</p> <p>Ekyinywa ni ibiri</p> <p>Sakanga enamba 2 n'ekyinywa ibiri lhuhuka kake</p> <p>Imaya ehithi hisathu neryo wubughe nayi ISATHU ISATHU</p> <p>ISATHU</p> <p>Thubughe esyonzakano esiri omo kyinywa isathu I-S-A-TH-U</p> <p>Ekyinywa ni isathu</p> <p>Sakanga enamba 3 n'ekyinywa isathu Lhuhuka kake</p> <p>Imaya ehithi hini neryo wubughe nayi INI INI INI</p> <p>Thubughe esyonzakano esiri omo kyinywa ini I-N-I Ekyinywa ni ini</p> <p>Sakanga enamba 4 n'ekyinywa ini Lhuhuka kake</p>

	<p>Imaya ehithi hithanu neryo wubughe nayi ITHANU ITHANU ITHANU</p> <p>Thubughe esyonzakanu esiri omo kyinywa ithanu I-TH-A-N-U ekyinywa ni ithanu</p> <p>Sakanga enamba 5 n'ekyinywa ithanu Lhuhuka kake</p> <p>Wasingya! Thulhuhuke kake ithunemuyitheghekera omubiri owakakwamako. Siwibirirawe ekalamu yawu.</p>
<p>Eridara 3 Dakika 8</p>	<p>Mwasingya erisubulha, ni ndambi y'erithera ebisosano n'erisakanga ebinywa. Mwimaye esyokalamu n'ebitabu byenyu.</p> <p>Thera omupira mughuma neryo wanasakanga ekyinywa nguma</p> <p>Thera emipira ibiri neryo wanasakanga ekyinywa ibiri</p> <p>Thera emipira isathu neryo wanasakanga ekyinywa isathu</p> <p>Thera emipira ini neryo wanasakanga ekyinywa ini</p> <p>Thera emipira ithanu neryo wanasakanga ekyinywa ithanu</p> <p>Thulhuhuke kake ithunemuyithekatheka erisakanga ebindi binywa</p>
<p>Eridara 4 Dakika 8</p>	<p>Sakanga ebinywa by'esyonamba esi</p> <p>6 7 8 9 10</p> <p>Wanganongera n'erithasyasakanga esi</p> <p>11 12 13 14 15 16 17 18 19</p> <p>20</p> <p>Erikyighunzerera thwamabiryigha erighanza n'erisakanga ebinywa by'esyonamba. Omwisomo lyethu erindi thukendisyongera eryigha erighanza</p>
<p>Eridara 5 Dakika 1 Eriluma</p>	<p>Ithukawunzerera erisomo lyethu wibukaye abandu abawikere nabu eka ERINABA OKO BYALHA ERIBIHENIA OMO MAGHETSE N'ESABBUNI OBULI NDAMBI OMUBIRI WAWU IKALE INIANAHENIRYE BUTHUKU BOSI. WUBYE EKA WIKALE IWUNE NDEKE BUKYAYI</p>

EBINDU EBIKASANGANAWA EKA- ERISOMA N'ERISAKANGA

Omwatsi mukulhu:

Omuthendekwa mubuya, thulhwe ithunemukania okwinaba oko byalha byethu erithulinda omo biro binu n'obundi buthuku obwosi. Hali ehindu hinyohohinyo ehiwithe obuyingu ehyanganikalha oko byalha byethu. Ehindu ehi bakahyahulha mw'ESYOGYAMUZI kandi ni hike-hike kutsibu omundu syangahilhangira omo liso. Iwukendiyithagha ekyuma ekyikahulhawa mwa mayikurosikopu erithoka erihilhangira. Kusangwa esyogyamuzi ni thuhuka thukethuke othuthelhangirawa, syanganingira omo mibiri yethu neryo isyaleka ithwalhwalha. Nokweryo wunabe oko byalha buli ndambi.

Obuthuku: Dakika 30

Eky'eritsuka nakyo Dakika 2	Wabukire muthendekwa mubuya! Wasingya eryasa omwisomo lino eryerisoma. Erina lyayi ningye Thuthalithwatsuka, ngasaba indi thuyithegheke erihulikirira. Wimaye ekalamu y'erikalha kutse ey'obwino n'ekyitabu ky'erisakangamu. Wubane ah'eryikalha. Wibuke eryikalha hali oko ghundi mundu. Ngalengekanaya wamabiriyithegheka.
ERIDARA 1 Dakika 7	Munabwire, thukayakanaya oko "EBINDU EBIKASANGAWA EKA WETHU" Eky'erimbere, Ni bindu byahi ebiri ebikabya eka? Ebi ni bighuma oko bindu ebikabya eka. Wuhulikirire ndeke wukendinyibwira ekyawamowa: SATHA EMIRENGE Y'EBINDU EBIRI EKA: 1. Embwa eyikasemba, 2. Esyosahani n'ebikyiku bikayihindanga, 3. Engyangwa yikabugha, 4. Ende eyikamolholhoka, 5. Omulenge w'enkoko, 6. Eritwanga, 7. Ebimbido bikayithinira, 8. Embene eyikamolholhoka, 9. Amaghetse akasenda oko tapu, 10. Ebithumbi bikaseghania.

	<p>Ni mirenge yahi eyawamowa?</p> <p>Owerimbere yilhwe ini mbwa eyikasemba. Enamba 2, 3, 4, 5, 6</p> <p>Ebighuma oko bindu ebikabya eka muli: emeza, esahani, embwa, omukeka, ende, ekyighona, eriregha</p> <p>Ebindu ebyosi ebiri eka biwithe omughasu.</p> <p>Embwa yiwithe mughasu kyi eka? Embwa yikalinda omuyi wethu.</p> <p>Ende yiwithe mughasu kyi? WUBULHAYE EKYIBULYO OKO BINDU EBYOSI</p> <p>Thulhuhuke kake ithunemuyitheghekerera erisoma</p>
<p>7 minutes</p>	<p>Abathendekwa mwasingya erilhwa omwilhuhuka! Hathya thukayigha erisoma. Thutsuke eryimba olhwimbu lhwethu lhw'erisoma</p> <p>WIMBE Ni saha y'erisoma, ni saha y'erisoma, Ithwe boshi haghuma, ni saha y'erisoma.</p> <p>Thwimbe haghuma. MWIMBE Ni saha Mwasingya.</p> <p>Hathya muhulikire ndeke ingabasomera ebinywa: <i>Wusome buli kyinywa iwunemuwatha ebyambana ebikyikolire.</i> <i>Wuwathikaye abiyi erighanza ebyambana by'esyonzakanu.</i> <i>Wusombole ekyinywa ekyiwithe omulenge kutse emirenge eyawukasonda erikangirirya</i></p> <p>emeza, esahani, embwa, omukeka, ende, ekyighona, eriregha</p> <p>- Thusombole kyinywa kyighuma: mukeka, kyikatsuka n'omulenge <i>m</i> na <i>u</i> erisomwa mwa /mu/ Hane ebindi binywa by'olhukonzo ebikatsuka na mu ebinywa nga: mukaka, mukuhi, musekere Muhereraye ebindi binywa 3 nayi inganamusakanga ebyayi. Wulhuhuke kake: Ni binywa byahi ebyawamabana? Besome omo mulenge munene. Wamakolha ndeke!</p> <p>Enzakanu yethu ni m, thwamathomeka kwa a yikasomeka mwa /ma/ Hane ebinywa by'Olhukonzo ebikatsuka na /ma/ nga mama, manene, maya</p> <p>Thukolesaye ebinywa byethu omo milhondo (omo syosentesi)</p> <p>emeza, esahani, embwa, omukeka, ende, ekyighona, eriregha</p>

	<p>Thutsuke n'ekyinywa emeza mw'ekyerilhangirirako: Emeza yithekire ahisi sy'omuthi.</p> <p>Nawu kolha owawu mulhondo. WUBYE NGAWUWITHE EYAWUKABUGHA NAYO. Nyibwire omulhondo wawu. Embwa yikathibitha oko bibi.</p> <p>N'ebindi binywa kubinakolhawe bithya: esahani, omukeka, ende, ekyighona, eriregha</p> <p>Wasingya omuthendekwa wayi mubuya! Thulhuhuke kake ithunemuyitheghekera erihulikirira omughane.</p>
<p>ERIDARA 3</p> <p>Dakika 8</p>	<p>-Hathya ngayabasomera omughane. Ngendibya inabirisoma, ngendibabulya ebibulyo. Muyithegheke. Mwikale ndeke, mulekisakanga kyindu kyosi, mukwamihulikirira.</p> <p>Lhuhuka kake! WUSOME OMUGHANE MIRUNDI IBIRI OMO MULENGE MUNENE ALIRIRYO BUTSIRA ERYANGUHYA.</p> <p style="text-align: center;">Eyisuka</p> <p>Eyisuka ni kyuma ekyathukakolesaya eka. Eyisuka yikathuwathikaya eririma . Ambi iwalhusya oko yisuka kw'omuthaka wukalhwa okwikolesyayo. Wubike eyisuka y'omo kyisenge ekyikabikawa mw'ebindi nuko isiyahuthalhaya omundu. Wubike eyisuka ahumire eririndayo erithendyasa kwamakenge. Wamalinda eyisuka ya ndeke yanganaghunza biro binene.</p> <p>Hathya süba omo bibulyo binü</p> <ol style="list-style-type: none"> 1. Eyisuka yiwithe mubiri kyi eka? 2. Eyisuka thutholere ithwabika yahi? 3. Ni butandwa bwahi ebwangaletwa n'eyisuka? 4. Hereraya ekyindi kyuma ekyathukakolesaya eka. <p>Thulebaye ngathwanamasubamo ndeke: WUTHASYASOMA OBULI KYIBULYO MIRUNDI IBIRI NERYO WUHERERAYE ERISUBAMO ERIHIKIRE.</p>

	<p>Ekyibulyo kyethu ky'erimbere kyilhwe: Eyisuka yiwithe mubiri kyi eka?</p> <p>Erisubamo: Eyisuka yikathuwathikaya eririma</p> <p>Hereraya oghundi mubiri w'erikolha: Omo ndambi yenyu y'eriluhuka mukendikolha epowemu (ekyithondomo) eyihambire oko kyindu ekyiwithe omubongo munene ekyikabya eka.</p> <p>Thuluhuke kake ithunemuyitheghekerera erisakanga.</p> <p>Isiwibirirawa ekalamu n'ekyitabu.</p>
<p>5 minutes</p>	<p>Mwasingya erisubulha! Ni ndambi y'eryigha erisakanga.</p> <p>Ngalengekanaya wunawithe ekalamu yawu n'ekyitabu.</p> <p>Muthemwasakanga thutsuke eryimba olhwimbu lhwerisakanga. Wimbe:</p> <p>Sakanga, sakanga, obuli mundu asakange!</p> <p>Sakanga enzakano k kk Hathya sakanga: e ee</p> <p>Sakanga ebinywa kesaya keha</p> <p>Hathya sakanga n'ebindi binywa:</p> <p>WUSOME OBULI KYINYWA NDEKE MIRUNDI IBIRI.</p> <p>WIMANAYE KAKE. WUBUGHE NZAKANU NGUMA NGUMA</p> <p>esahani, omukeka, eyisuka, embwa</p> <p>Hathya thusakange omulhondo omuli ekyinywa embwa</p> <p>Embwa yikathibitha oko mwibi. WUSOME OMULHONDO</p> <p>NDEKE OMO MULENGE MUNENE</p> <p>Mwasingya</p> <p>Omo ndambi yawu y'eriluhuka wukendithera ekyisosano ky'ebindu bisathu ebiri eka wenyu. Wanganabitheka mwesyorangyi wamabya iwunawithe esyokalamu sy'esyorangyi. Wusakange omulhondo oko buli kyisosano. Wubike omubiri wawu ndeke. Wukendisyakangania w'omukangirirya amasukuru akatsuka.</p>

	<p>Omwisomo lino, thwamakania oko bindu ebiri eka n'emighasu yabyo. Omwisomo lyethu erindiu thukendisyakania oko bulhambu obwathwikeremo. Wusyasa n'ekyisosano ky'omundu oyowasi oyuwithe ekyitsumbi kyinene.</p>
Dakika nguma	<p>Ithukawunzerera erisomo lyethu wibukaye abandu abawikere nabu eka ERINABA OKO BYALHA ERIBIHENIA OMO MAGHETSE N'ESABBUNI OBULI NDAMBI OMUBIRI WAWU IKALE INIANAHENIRYE BUTHUKU BOSI. WUBYE EKA WIKALE IWUNE NDEKE BUKYAYI</p>

EBINDU EBIKASANGAWA EKA WETHU

ERIGHANZA

Omwatsi mukulhu muhyamuhya:

Abathendekwa babuya, ngalengekanaya mune ndeke kandi munayirindire erilhaba omwinaba oko byalha n'esabbuni n'amaghetse! Nganasi abaghuma omwinywe kutse ababuthi benyu banemwowa Purezidenti Yoweri Kaguta Museveni akakania oko Korona. Obulhwere obu bunemuyitsatsanga omo kyihugho ekyosi. Isimwahulikirira abandu omo kyalu kyenyu abakabugha bathi ekorona siyiriho kandi bathi yiri omo syotawuni sisa. EYIHI, yiri ehosihosi kyakyaalekire ibathubwire ambu thubye eka kandi n'amathendekero iniakyingwa.

OBUTHUKU: Dakika 30

Ekyeritsuka nakyoy Dakika 1	<p>WABUKIRE MUTHENDEKWA MUBUYA! Wasingya eryasa omwisomo lya munabwire ery'Erighanza. Erina lyayi ningye <u>Thuthalithwatsuka, ngasaba indi thuyithegheke erihulikirira. Wimaye ekalamu y'erikalha kutse ey'obwino n'ekyitabu ky'erisakangamu. Wubane ah'eryikalha. Wibuke eryikalha hali oko ghundi mundu. Ngalengekanaya wamabiriyithegheka.</u></p>
Eridara 1 Dakika 5	<p>Omwisomo lyethu munabwire, thukasamalira ebindu ebikabya eka. Thukayigha eribighanza babiri-babiri. Ni bugha ambu omo syogurupu sy'abandu babiri-babiri.</p>

	<p>Thuthali thwatsuka, thwimbe olhwimbu lhw'erighanza: Munibukire olhwimbo olho?</p> <p>Mwimbe nayi: WIMBE.</p> <p>Nguma, ibiri, isathu, ini, ithanu, mukagha, musangyu x 2</p> <p>Nguma, ibiri, isathu, yitsyade nayi, x 2</p> <p>Thughanze ehithi hyethu 1, 2, 3, 4, 5, 6, 7, 8, 9, 10</p> <p>Thusamalire omubiri.</p> <p>Wuwithe amesu mangahi? GHANZA OMO MULENGE MUNENE 1 2</p> <p>Amathwe ni mangahi? GHANZA OMO MULENGE MUNENE 1 2</p> <p>Amaghulhu ni mangahi? GHANZA OMO MULENGE MUNENE 1 2</p> <p>Ebyalha ni bingahi? GHANZA OMO MULENGE MUNENE 1 2</p> <p>Ebisandu ni bingahi? GHANZA OMO MULENGE MUNENE 1 2</p> <p>Samalira ebindu ebiri eka. Ni byahi ebikaghenda bibiri-bibiri? HABYE NGAHALI OMUNDU OYUKAKUBWIRA: esyongetha, esyosilipa, esyobbutusi, esyosokisi</p> <p>Ebindu byamathondwa bibiri-bibiri, ekyo kyakyikahulhawa mwa kanyabubiri.</p>
<p>Eridara 2</p> <p>Dakika 8</p>	<p>Mwasingya erisubulha.</p> <p>Thukayathonda haghuma ehithi hyethu n'amabwe mwa bibiri-bibiri.</p> <p>Thunayitheghekire?</p> <p>Thutsuke erighanza ehithi 20. THUGHANZE OMO MULENGE MUNENE 1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20</p> <p>Thubithonde bibiri-bibiri THUGHANZE OMO MULENGE MUNENE 1, 2; 1, 2; 1, 2; 1, 2; 1, 2; 1, 2; 1, 2; 1, 2; 1, 2; 1, 2; 1, 2</p> <p>(thukowa omulenge w'amabwe akayihindanga)</p>

	<p>Imaya omuthondo mughuma. Muli ehithi hingahi? Thubare 1,2 ni 2. Imaya emithondo ibiri. Muli ehithi hingahi? Thubare 1,2,3,4 ni 4</p> <p>Imaya emithondo mukagha. Muli ehithi hingahi? WUBYE NGAHALI OMUNDU OYUKAKUBWIRA 13. Ni na kwenene, lebaya ndeke BARA OMO MULENGE MUNENE</p> <p>Mwasingya. Mwamabiribara omo bibiri-bibiri. Mwasingya! Thuluhuke kake ithunemuyithekatheka busana n'omubiri oghundi owakasa. Mwibuke ehithi hy'eribara n'ekalamu.</p>
<p>Step 3 8minutes Eridara 3 Dakika 8</p>	<p>Mwasingya erisubulha. Thukayasondaya esyonamba esibulire ithunemuhambania ibiri ibbwa muleke thutsuke eryimba olhwimbo lhw'erighanza</p> <p>Mwimbe nayi: WIMBE.</p> <p>Nguma, ibiri, isathu, ini, ithanu, mukagha, musangyu x 2 Nguma, ibiri, isathu, yitsyade nayi, x 2</p> <p>Mubare nayi. Thuthasyabara ehithi hyethu/ amabwe 1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20</p> <p>Mukayasondaya enamba eyikakwamako omunemutaranizyako ibiri. Muhulikirire</p> <p>f) 2, 4, 6, 8, ... Ni namba yahi eyikwamireko? MUBARE OMO MULENGE MUNENE eribana 10</p> <p>g) 2, 4, 6, 8, 10, 12,</p> <p>h) 2, 4, 6, 8, 19, 12, 14, 16, 18,</p> <p>i) 12, 14, 16,</p> <p>j) 8, 10, 12, 14,</p> <p>Thulebaye ngathwanamabihika. LEBAYA ESYONAMBA ESYOSI OMO MULENGE MUNENE</p> <p>Thwanganaluhuka kake thukayithegheka busana nebhikayasubukako</p>

<p>Eridara 4 Dakika 8</p>	<p>Thukayasamalira emiyi (amaka) muthina-muthina. Mukayasuba omo bibulyo ebihambire oko miyi eyo MUHULIKIRIRE</p> <ol style="list-style-type: none"> 1. Ende ya Bwambale yikamuhereraya esyolita 2 sy'amathe buli kyiro. Ni syolita singahi esya Bwambale akalhusaya omonde yiwe omo biro musangyu? 2. Nyakato mwathunga ebyalya erilhwa omo gavumenti. Mwathunga esyokyilo ibiri sy'esukali, esyokyilo ibiri sy'ebihimba, esyokyilo ibiri sy'obusara bw'ebikusa n'esyokyilo ibiri sy'amathi w'eyisyano. Mwathunga kyilo singahi esyosi haghuma? <p>Thulebaye ngathwanamabihika. EKYIBULYO 1 kyikabugha</p> <p>WUSOME ESYONAMBA ESYOSI OMO MULENGE MUNENE</p> <p>Omo bikuhi thwamabirighanza ebindu ebiri eka omo bibiri-bibiri.</p> <p>Omwisomo lyethu erikasa thukendisyakania oko bandu muthina-muthina abali omo kyalu kyethu.</p>
<p>Dakika nguma</p>	<p>Ithukawunzerera erisomo lyethu wibukaye abandu abawikere nabu eka ERINABA OKO BYALHA ERIBIHENIA OMO MAGHETSE N'ESABBUNI OBULI NDAMBI OMUBIRI WAWU IKALE INIANAHENIRYE BUTHUKU BOSI. WUBYE EKA WIKALE IWUNE NDEKE BUKYAYI</p>

ABANDU ABALI OMO BULHAMBU BWETHU- ERISOMA N'ERISAKANGA

Omwatsi mukulhu muhya-muhya:

Abathendekwa babuya, ekyindu kyighuma ekyanganza eribabwira munabwire kyiri kyithi wamabya iwukayowa mw'omutsutsa, iwunemukoholha, kutse iwukabulha kuwukahumulha, wutholere iwayalebya omudokita esaha eno. Ehi ehyosi ni himinyikalhu hy'omubulhwere obu. Ni KYIKULHU kutsibu eriyalebya omudokita wamabya iwulhwere kusangwa obulhwere obu bukalire.

<p>INTRODUCTION</p> <p>2 minutes</p>	<p>Wabukire mwanithu muthendekwa! Wasingya eryasa omwisomo lino ery'erisoma n'erisakanga</p> <p>Erina lyayi n'ingye Thuthalithwatsuka, ngasaba indi thuyithegheke erihulikirira. Wimaye ekalamu y'erikalha kutse ey'obwino n'ekyitabu ky'erisakangamu. Wubane ah'eryikalha. Wibuke eryikalha hali oko ghundi mundu. Ngalengekanaya wamabiriyithegheka.</p>
<p>STEP 1:</p> <p>7 minutes</p> <p>ERIDARA 1:</p> <p>Dakika 7</p>	<p>Munabwire thukayakanaya oko “ABANDU ABALI OMO BULHAMBUBWETHU”. Thukayakanaya oko bandu abawithe ekyitsumbi. Abandu abawithe ekyitsumbi kutse omughasu munene b'abandu abakathuwathikaya omo myanya eyathwikeremu. Bakathukolera mubiri munene. Abandi thukabathuha kandi ibbwa n'abandi sithulibathuha. Ni bandu bahi abawithe ekyitsumbi kutse omughasu munene omo bulhambu bwethu? Omughuma wa kubo ane omo powemu (ekyithondomo) eyiri ahikwa.</p> <p>Muhulikirire: BUGHA:, Mukangirirya, mukangirirya, mukangirirya! Thuwithe ekyitabu, Kyiri mw'omughane, asa wulebaye!</p> <p>Thubughe haghuma epowemu: THASYABUGHAYO: Mukangirirya, mukangirirya, mukangirirya!</p> <p>Hathya thwamabiriminya omukangirirya ng'omughuma oko bandu abawithe omughasu munene omo bulhambu! Abandi bandu ni bahi?</p> <p>WUBYE NGAHALI OMUNDU EYAGHUKAKANAYA NAYO: Dokita, omupolisi, omubumbi, omwahule, omufaza, omurandi, omulimi, omudereva, owebbodabboda, ooooooh! Wasingya kutsibu!</p> <p>Nyibwire: Omukangirirya akakolha kyi? Omukangirirya akasomesaya abana.</p> <p>Kandi omurandi? Omurandi akakolha ebithumbi.</p> <p>Oyukathambira abalhwere ni ndi? Omudokita akathambira abalhwere.</p>

	<p>Kandi omulimi? Omulimi akahera ebyalya. Omubumbi akakolha kyi? Omubumbi akabumba amalegha.</p> <p>Thulhuhuke kake ithunemuyitheghekera erisoma.</p>
<p>Eridara 2 Dakika 7</p>	<p>Omuthendekwa wayi mubuya wasingya erisubulha! Hathya thukayigha erisoma. Thutsuke eryimba olhwimbo lhwethu lhw'erisoma.</p> <p>THWIMBE haghuma WIMBE: Erisoma lyuwene, erisoma lyuwene</p> <p>Hathya muhulikirire ndeke ingasoma ebinywa bino: <i>Wusome obuli kyinywa iwunemukywatha. Wuwathikaye abiyi erighanza ebyambana. Wusombole ekyinywa kyighuma ekyiwithe omulenge kutse emirenge eyawukasonda eritheka kw'akaghalha.</i> omukangirirya dokita omulimi omurandi omubumbi</p> <p>Thwimaye kyinywa kyighuma: mukangirirya, kyikatsuka n'omulenge m na u erisomwa mwa /mu/ Hane ebindi binywa by'olhukonzo ebikatsuka na mu ekyerilhangirirako mukuhi, musighe, mulimi. Hereraya ebindi binywa 3 nayi inganemusakanga ebyayi. Lhuhuka kake: Ebyaghu binywa ni byahi? BISOME OMO MULENGE MUNENE muthibithi, musohi, mukami Wamathoka!</p> <ul style="list-style-type: none"> - Thuthasyasamalira eyindi nzakanu l l yikatsuka ebinywa nga lebaya, letha, lira <p>Thukole emilhondo omo binywa byethu: omukangirirya dokita omulimi omurandi omubumbi</p> <p>Thutsuke n'ekyinywa omulimi ng'ekyerileberyako Omulimi akahera ebinyangwa.</p> <p>Nawu kolha owawu mulhondo. WUBYE NGAWUWITHE OMUNDU EYAGHUKABUGHA NAYO. Nyibwire omulhondo wawu. Omulimi akaghenda omo kathali.</p>

	<p>N'ebindi kuwunabikole wuthya: omukangirirya dokita omurandi omubumbi</p> <p>Abathendekwa bayi babuya mwasingya! Thulhuhuke ithunemuyitheghekera erihulikirira omughane.</p>
<p>ERIDARA 3: Dakika 8</p>	<p>Mwasingya erilhwa okwilhuhuka. Ngayabasomera omughane. Ngendibya inabirisoma, ngendibabulya obibulyo. Muyithegheke.</p> <p>Mwikale ndeke, isimwasakanga kyindu kyosi-kyosi, mukwamihulikirira.</p> <p>Lhuhuka kake. WUSOME OMUGHANE NDEKE MIRUNDI IBIRI BOLHOBOLHO</p> <p style="text-align: center;">Omurandi w'omo bulhambu</p> <p>Ali ni murandi omo bulhambu bw'eMuyina. Akakolha ebithumbi ebyuwene n'esyomeza. Akakolha esyongyingu esyuwene n'esyokabada. Obuli kyiyo abandu bakasa omo duka ya Ali bakasyaghulha ebindu muthina-muthina. Abandu bakanza erisyaghulira oku Ali kusangwa akakolha ebindu ebyuwene. Hathya Ali ni mugaga.</p> <p style="text-align: center;">Hathya suba omo bibulyo bino</p> <ol style="list-style-type: none"> 1. Hereraya ebindu bibiri ebya Ali akakolha. Lhuhuka kake 2. Busana na kyi abandu abakayaghulha eby'erikolesya ng'ebithumbi oku Ali? Lhuhuka kake 3. Hereraya ekyinywa ekyiri oko lhundi luhandi (oposite)lhw'ekyinywa kyuwene. Lhuhuka kake <p>Thulebaye ngathwanamasubamo ndeke: WUTHASYASOMA OBULI KYIBULYO ENGENDO YAKABIRI NERYO WUHERERAYE ERISUBAMO ERIHIKIRE. Ekyibulyo 1 kyilhwe, Hereraya ebindu bibiri ebya Ali akakolha</p>

	<p>Erisubamo: Ali akakolha bithumbi/esyomeza/esyongyingo/esyokabada</p> <p>Hereraya oghundu mubiri w'erikolha: Omo ndambi yenyu y'eriluhuka mukendikolha akapowemu kakuhi oko mundu oyuwithe omughasu munene omo bulhambu.</p> <p>Thulhuhuke kake ithunemuyithekathekera erisakanga. Isiwibirirawa ekalamu n'ekyitabu.</p>
<p>5 minutes</p>	<p>Mwasingya erisubulha! Ni saha y'eryigha erisakanga. Ngalengekanaya wunahambire ekalamu n'ekyitabu.</p> <p>Thuthethwatsuka erisakanga thwimbe haghuma olhwimbo lhw'erisakanga. WIMBE: Ni saha y'erisakanga!</p> <p>Sakanga enzakanu: m mm Hathya sakanga: I II</p> <p>Sakanga ebinywa: liba lisaya</p> <p>Hathya musakange ebinywa:</p> <p>WUSOME OBULI KYINYWA NDEKE MIRUNDI IBIRI. WULHUHUKU KAKE WUSOME NZAKANU NGUMA NGUMA</p> <p>omulimi omurandi omusohi omunasi</p> <p>Sakanga omulhondo omuli ekyinywa omulimi: SOMA OMULHONDO NDEKE</p> <p>Omulimi akaghenda omo kathali. Mwasingya</p> <p>Omo ndambi yenyu y'eriluhuka mukenditherera ekyisosano ky'omukangirirya, omulimi, omurandi n'omunasi.</p> <p>Wukendisakanga omulhondo oko buli kyinywa.</p> <p>Omwisomo lino, thwamakania oko bandu abawithe omughasu munene omo bulhambu bwethu. Omwisomo lyethu erindi thukendibya n'ebindi bindu by'erikaniako ebihambire oko bulhambu bwethu.</p>
<p>1 minutes Dakika 1</p>	<p>Ithukawunzerera erisomo lyethu wibukaye abandu abawikere nabu eka</p>

	<p>ERINABA OKO BYALHA ERIBIHENIA OMO MAGHETSE N’ESABBUNI OBULI NDAMBI OMUBIRI WAWU IKALE INIANAHENIRYE BUTHUKU BOSI. WUBYE EKA WIKALE IWUNE NDEKE BUKYAYI</p>
--	--

EBINDU EBIKABYA EKA WETHU

ERIGHANZA

OBUTHUKU: Dakika 30

<p>Introduction 1 minute Ekyeritsuka nakyo Dakika 1</p>	<p>WABUKIRE muthendekwa mubuya! Ngakuthangirira omwisomo lyethu y’erighanza eryamunabwire</p> <p>Erina lyayi ningye Thuthethwatsuka, Ngasaba indi thuyithegheke erikwama erisomo. Mwimaye ehithi ehyathukabara, ekalamu y’omuthi kutse ekalamu y’obwino n’ekyitabu ky’erisakangamo. Wubane ah’eryikalha. Wibuke erithendyikalha hakuhi n’oghundi mundu. Ngalengekanaya wamabiriyithegheka</p>
<p>Eridara 1 Dakika 5</p>	<p>Omwisomo lyethu munabwire, thukayigha erighanza ebindu ebithondire mwa bithanu bithanu.</p> <p>Ni kyindu ekyilhumire ekyerikolha.</p> <p style="text-align: center;">Thuthethwatsuka, thwimbe olhwimbu lhw’erighanza:</p> <p>Munibukire olhwimbo olhwo? Mwimbe nayi: WIMBE</p> <p>Nguma, ibiri, isathu, ini, ithanu, mukagha, musangyu.... x 2</p> <p>Nguma, ibiri, isathu, yitsyade nayi.....</p> <p>Thubare ehithi hyethu 1,2,3,4,5</p> <p style="text-align: center;">Thusamalire emibiri yethu.</p> <p style="text-align: center;">Sumba ebyalha byawu bighuma. Wuwithe minwe mingahi?</p> <p style="text-align: center;">Thubare</p> <p style="text-align: center;">MUBARE OMO MULENGE MUNENE</p> <p>1 2 3 4 5 Mwamathoka!!! Thuwithe eminwe ithanu.</p>

	<p>Hathya hamba oko kysisandu. Wuwithe amanwe mangahi? Thubare thwangasamalira MUBARE OMO MULENGE MUNENE</p> <p>1 2 3 4 5 Thuwithe amanwe athanu</p> <p>Eka wethu yine ebindu ebikabya inina bithanu. Wasi kyahi? WUBYE NGAHALI OMUNDU OYUKAKUBWIRA: Inga mukangirirya. Amanwe w'engoko, ekyithi ky'omuhoko kyikanathunga ehindi hithi hithanu. NI KWENENE Thotholere ithwasamalira ndeke. Letha engoko yayi lhuba-lhuba HIRAKO ERILHAKA LY'ENGOKO Wubye ngaghukabara 1 2 3 4 5 Ni kwenene niathanu</p> <p>Mwasingya! Thulhuhuke kake ithunemuyithekatheka busana n'omubiri oghundi owakayasa. Simwibirirawe ehithi hyenyu hy'erighanza</p>
<p>Eridara 2 Dakika 8</p>	<p>Mwasingya erisubulha Hathya thukayathonda ehithi hyethu n'amabwe omo mithondo eya ithanu ithanu. Thutsuke? Thuthatsuka erighanza ehithi 20. Thubare OMO MULENGE MUNENE 1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20 Thuhitheke omo mithondo ya hithanu hithanu BARA OMO MULENGE MUNENE ehithi hikowika hikatoka 1, 2, 3, 4, 5; 1, 2, 3, 4, 5; 1, 2, 3, 4, 5; 1, 2, 3, 4, 5</p> <p>Imaya omuthondo mughuma. Muli ehithi hingahi? Thubare 1, 2, 3, 4, 5 muli 5.</p> <p>Imaya emithondo ibiri. Muli ehithi hingahi? Thubare 1, 2, 3, 4, 5, 6, 7, 8, 9, 10 muli 10.</p> <p>Thwimaye emithondo isathu. Muli ehithi hingahi? Thubare 1, 2, 3, 4, 5, 6, 7, 8, 9, 10, 11, 12, 13, 14, 15 muli 15</p> <p>Imaya emithondo ini. Muli ehithi hingahi? WUBYE NGAHALI OMUNDU OYUKAKUBWIRA 21 Ni na kwenene, thulebaye BARA OMO MULENGE MUNENE</p>

	<p style="text-align: center;">Mwasingya.</p> <p style="text-align: center;">Mwamabiribara omo bithanu bithanu</p> <p>Mwasingya! Thuluhuke kake ithunemulindirira oghundu mubiri owakwamireko. Siwibirirawe ehithi hyawu n'ekalamu.</p>
<p>Eridara 3 Dakika 8</p>	<p>Mwasingya erisubulha. Thukayasondaya enamba eyikasubukako ithunemuthomeka kw'ithanu ibbwa thutsuke eryimba olhwimbo lhw'erighanza</p> <p>Nguma, ibiri, ngaboha engetha yayi</p> <p>Mubare nayi. Thuthasyabara ehithi hyethu/ amabwe</p> <p>1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20</p> <p>Mukayasondaya enamba eyikwamire imunemwongera kw'ithanu. Muhulikire.</p> <p>a) 5, 10, ... Ni namba yahi eyikakwamako? BARA OMO MULENGE MUNENE ERIBANA 15</p> <p>b) 5, 10, 15,</p> <p>c) 5, 10, 15, 20,</p> <p>d) 5, 10, 15, 20, 25,</p> <p>e) 5, 10, 15, 20, 25, 30,</p> <p>Thulebaye ngathwanamabihika. LEBAYA ESYONAMBA ESYOSI OMO MULENGE OWAKOWIKA</p> <p>Thwanganaluhuka kake ithunemulindirira ebikakwamako</p>
<p>Eridara 4 Dakika 8</p>	<p>Thukayasuba omo bibulyo ebiri mw'ebinywa. MUHULIKIRIRE NDEKE INGASOMA:</p> <ol style="list-style-type: none"> 1. Obuli kyibo muli amaya 5. Hamabya ihali ebibo 3, amaya aghosi iniakendibya mangahi? 2. Abambesa 2 bikere oko mukeka. Obuli mumbesa awithe ebyalha 2. Obuli byalha biwithe eminwe 5. Abambesa 2 bawithe eminwe mingahi eyosi haghuma? <p>Thulebaye ngathwanamabana ebihikire. EKYIBULYO 1 kyikabugha kyithi ESYONAMBA ESYOSI SISOMAWE OMO MULENGE MUNENE</p>

	Erighunzerera thwamabiryigha erighanza omo mithondo yithanu ithanu. Omo ndambi yawu y'eriluhuka, wukendithimbya amesu w'eka neryo iwathera ebindu ebikaghenda bithanu bithanu. Wubike omubiri wawu. Wasingya
Eridara 5 Dakika 1 Eriluma	Ithukawunzerera erisomo lyethu wibukaye abandu abawikere nabu eka ERINABA OKO BYALHA ERIBIHENIA OMO MAGHETSE N'ESABBUNI OBULI NDAMBI OMUBIRI WAWU IKALE INIANAHENIRYE BUTHUKU BOSI. WUBYE EKA WIKALE IWUNE NDEKE BUKYAYI

OMUBIRI W'OMUNDU N'AMAGHALHA

OBUYONGYO N'OBUYITSOTSE

Obuthuku: Dakika 30

EKYERITSUKA NAKYO Dakika 3	Abahulikiriri banzwa, mwasingya eryasa omwisomo lino Erina lyayi ningye Thuthali thwatsuka erisomo ngabasaba muyithegheke eriyahulikirira, wimaye ekalamu n'olhupapura lhw'erisakanga kw'ebindu bikulhu. Mubane ah'eryikalha. Simwibirirawe indi ambi ahakathikathi kaghu n'oghundi mundu ihasighalha omwanya. Ngalengekanaya oko kathambi kanu mwamabiriyithegheka. ABATHENDEKWA MWABUKIRE?
STEP 1: 3mins	Thukayigha oko "OBUYONGYO BW'OMUNDU" Ni bugha ambu eribya ithunahenirye. MUSUBEMU OBUYONGYO BW'OMUNDU, MUTHASYASUBAMO; OBUYONGYO BW'OMUNDU. MWAMAKOLHA NDEKE
Eridara 2	Ni mitse yahi emibuya eyihambire oko maghalha? Emitse yethu mibuya eyihambire oko maghalha muli:

<p>Dakika 10</p>	<ul style="list-style-type: none"> • Erinabya emibiri, amesu, ebyalha omo maghetse awahenirye • Eritsanula esyonzwiri syethu omo kyitsanula • Erisiga amenu wethu omo musigo • Erikuruta ebisandu byethu • Erinaba omo busu <p>MUSUBEMU ingaghunza erikyibugha; erinaba, eritsanula, erisiga, erikuruta, eryogha MWAMAKOLHA NDEKE</p> <p>Ngalengekanaya munasi olhwimbu lhunu: Kungatsanula indya/erinabia/ esyonzwiri syayi, Ngatsanula esyonzwiri syayi x 2 omo ngyakya ngyakya. Thwimbe haghuma.</p> <p>Mwamuwania</p>
<p>STEP 3:</p> <p>8mins</p> <p>ERIDARA 3</p> <p>Dakika 8</p>	<p>Thukakolesaya kyi eryuwania emibiri yethu?</p> <ul style="list-style-type: none"> • Amaghetse awahenirye; erinaba, eryogha, eryoya, erisiga • Esabbuni, • Etawelu, akakyimba akahenirye, ebbeseni • Ekyitsanula, omusigo <p>Hathya musakange ebinywa ebyangayabugha: amaghetse, esabbuni, ekyitsanula, etawelu, ebbeseni, embido</p> <p>MWAMAKOLHA NDEKE</p>
<p>Step 4:</p> <p>5mins</p> <p>Eridara 4:</p> <p>Dakika 5</p>	<p>Hathya thuli n’obulhwere bwa COVID19 (Korona):</p> <ul style="list-style-type: none"> • Thukahabulhawa erithendihamba omo mesu, enindu, obunu kusangwa akahuka kanganalhaba omo bitsweka ebyo neryo ikingira omo mubiri wethu. • Erinaba oko byalha ndeke omo sabbuni n’amaghetse habwa esyosekendi 20. • Erithendithwira ebithandi kyithya-kyithya • Eriswika obunu bwethu omo katambara thwamabya ithukakoholha • Erikolesya akatambara kiutse akapapura thwamabya ithukamira kutse erithwa etsihya <p>Munabwire thwamigha oko mitse mibuya eyikalinda emibiri yethu.</p> <p>Omwisomo erikasa, thukendisyigha oko buyitsotse.</p> <p>Mwasingya erihulikirira n’erikwama erisomo lino</p>

<p>OMWATSI MUKULHU</p> <p>Dakika 3</p>	<p>Ithukaghunzerera erisomo lyethu, thwibuke ERINABA OKO BYALHA ERIBIHENIA OMO SABBUNI N’AMAGHETSE OBULI NDAMBI</p> <p>OMUBIRI WAWU IKALE INIANAHENIRYE BULI NDAMBI</p> <p>MUBYE EKA, MWIKALE IMUNE NDEKE BUKYAYI</p>
--	--

OBUYITSOTSE

Obuthuku: Dakika 30

<p>INTRODUCTION (3mins)</p>	<p>Abahulikiriri banzwa/ABIYI, mwasingya eryasa oko ndegheka yethu Erina lyayi ningye ngikere Inde natsuka erisomo ngabasaba muyithegheke eriyahulikirira, wimaye ekalamu n’olhupapura lhw’erisakanga kw’ebindu bikulhu. Mubane ah’eryikalha. Simwibirirawe indi ambi AHAKATHIKATHI KAGHU N’OGHUNDI MUNDU IHASIGHALHA OMWANYA. Ngalengekanaya oko kathambi kanu mwamabiriyithegheka. ABATHENDEKWA MWABUKIRE?</p>
<p>ERIDARA 1: Dakika 5</p>	<p>Munabwire, thukayigha oko “Obuyitsotse” Ngokuthwanguwania ebithuthimbireko n’ahathwikere eribya ihanahenirye. Musubemo ingaghunza erikyibugha OBUYITSOTSE, OBUYITSOTSE. KYAMUWANA KUTSIBU THANGANABUGHA HAGHUMA AKASIMU KANU? Ngayabiraya oburofu bulhweho x 3 Fwaa! Fwaa! Fwaa!</p>
<p>ERIDARA 2 Dakika 13</p>	<p>Ni byahi ebyathwangakolha buli kyiyo erilhangira thuthi omwanya owathuthimbireko n’ahathwikere hanahenirye? Thuthasamalire ebindu ebyuwene ebyathwangakolha erithoka eribya ahuwene ahathe hangalhwa amalhwere.</p> <p>- Erithemerera obuthalha</p>

	<ul style="list-style-type: none"> - Eribirya amanyumba, obuthalha - Erilhusya ebirofu oko miyi yethu n'erihisya ebirofu ebyo - Erisimura ahisi omo nyumba - Erilhusya amaghetse awalekire omo byuna awangabya iniali oko buthalha - Eririmirira emiyi yethu, erithimba kuyo <p>HATYA suba omo binywa ebi iwunanyikwamire erithemerera, eribirya, erilhusya, eririma</p>
ERIDARA 3: Dakika 9	<p>Ni byerikolesya byahi ebikulhu ebyathwangakolesya eryuwanina ebithuthimbireko?</p> <p>Imaya ekalamu y'obwino/ ekalamu y'erikalha wangesakanga ebindu ebyawukakolesya wukuwanina ebithuthimbireko</p> <p>Hathya ngayasoma ebindu ebyangalinabyo neryo nawu wulebaye ngawunabiwithe ebyosi, ekyawuthawithe wukyisakange</p> <p><i>eyisuka, olhubiryo, ereki, ekyitiyo, ekyipanga, amaghetse, ekyikoropo, ebbeseni, akathiri, enengere, omuhamba, esabbuni</i></p> <p>Imaya ekyitabu kyawu wanathera ebisosano by'ebindu ebi kandi wanasakanga amena wabyo.</p> <p>WUBIKE OMUBIRI WAWU, ERISUBA OKWITHENDEKERO LIKENDISABYA LIKAHIKA WUKENDISYAHENERYA OMUBIRI OYO W'OMUKANGIRIRYA INIAKEBERAGHU.</p>
OMWATSI MUKULHU Dakika 2	<p>Ithukawunzerera erisomo lyethu ngakwibukaye erinaba oko byalha mughulhu wosi</p> <p>WUNABE OKO BYALHA ERIBIHENIA OMO MAGHETSE N'ESABBUNI OBULI NDAMBI OMUBIRI WAWU IKALE INIANAHENIRYE BUTHUKU BOSI.</p> <p>WUBYE EKA WIKALE IWUNE NDEKE BUKYAYI</p>

AMALHWERE AWAKABANIKA KUTSIBU

Obuthuku: Dakika 30

<p>INTRODUCTION 2mins</p>	<p>Abahulikiriri banzwa/ABIYI, mwasingya eryasa oko ndegheka yethu Erina lyayi ningye ngikere Inde natsuka erisomo ngabasaba muyithegheke eriyahulikirira, wimaye ekalamu n’olhupapura lhw’erisakanga kw’ebindu bikulhu. Mubane ah’eryikalha. Simwibirirawe indi ambi AHAKATHIKATHI KAGHU N’OGHUNDI MUNDU IHASIGHALHA OMWANYA. Ngalengekanaya oko kathambi kanu mwamabiriyithegheka. ABATHENDEKWA MWABUKIRE?</p>										
<p>STEP 1: 10mins</p>	<p>Omo masomo wenyuma, muthwasomire oko buyongyo bw’omundu kandi ngokuthwanguwania ahathwikere. Munabwire, thukayatsuka n’ekyindu kyihya-kyihya “Amalhwere” Musubemu, AMALHWERE, AMALHWERE Hali ebihuka n’othuhuka ebikalethera abandu b’amalhwere</p>										
<p>Eridara 2: Dakika 10</p>	<p>Eritsuka erirengkania. Wukanayitheghereraya amalhwere nga nikyi? Wunewathalhalwa obulhwere bwosi-bwosi?</p> <p>Ni bihi ebikaheka kutsibu amalhwere omo kyipindi kyethu?</p> <p>Ebighuma oko bindu ebikaheka amalhwere muli;</p> <p>Ehisido, emibu, ebihubi, esyombeba, esonyenze, esisukyi MUSUBE OMO KYINYWA INGAGHUNZA ERIKYIBUGHA</p>										
	<p>Amalhwere awakalethawa n’ebihuka ebi. Ekolera, omutsutsa wa maleriya, omutsutsa w’ebyenda, embongera (obulhwere bw’eriyighotserako) MUSUBE OMO KYINYWA INGAGHUNZA ERIKYIBUGHA</p> <table border="1" data-bbox="555 1597 1222 2049"> <thead> <tr> <th data-bbox="555 1597 858 1675">Ekyikaheka</th> <th data-bbox="860 1597 1222 1675">Obulhwere</th> </tr> </thead> <tbody> <tr> <td data-bbox="555 1677 858 1756">Eysisukyi</td> <td data-bbox="860 1677 1222 1756">Ekolera</td> </tr> <tr> <td data-bbox="555 1758 858 1836">Ebinyenze</td> <td data-bbox="860 1758 1222 1836">Akasinini</td> </tr> <tr> <td data-bbox="555 1839 858 1917">Omubu</td> <td data-bbox="860 1839 1222 1917">Omutsutsa wa maleriya</td> </tr> <tr> <td data-bbox="555 1919 858 2049">omulimalima</td> <td data-bbox="860 1919 1222 2049">ebbola</td> </tr> </tbody> </table>	Ekyikaheka	Obulhwere	Eysisukyi	Ekolera	Ebinyenze	Akasinini	Omubu	Omutsutsa wa maleriya	omulimalima	ebbola
Ekyikaheka	Obulhwere										
Eysisukyi	Ekolera										
Ebinyenze	Akasinini										
Omubu	Omutsutsa wa maleriya										
omulimalima	ebbola										

		Ekyihubi	Obulhwere bw'eriighotserako	
ERIDARA 4 Dakika 5		<ul style="list-style-type: none"> • Hathya imaya ekyitabu kyawu n'ekalamu wuhulikirire ndeke wanasakanga kyino eyisukyi, ekyinyenze, omubu, omulimalima, ekyihubi • Sakanga obulhwere obwabikaheka • Wulikirira erisubamo erihikire wanalebya ahawamathalhuka <p>Wamakolha ndeke! Wasingya erihulikirira</p>		
Omwatsi mukulhu Dakika 2		<p>Ithukawunzerera erisomo lyethu wibukaye abandu abawikere nabu eka ERINABA OKO BYALHA ERIBIHENIA OMO MAGHETSE N'ESABBUNI OBULI NDAMBI OMUBIRI WAWU IKALE INIANAHENIRYE BUTHUKU BOSI. WUBYE EKA WIKALE IWUNE NDEKE BUKYAYI</p>		

**AMALHWERE AWAKAHAMBA EBYENDA AWAKASIGHALIRA
N'ESYONZOKA SY'OMONDA**

Obuthuku: Dakika 30

INTRODUCTION	Abathendekwa babuya, mwasingya erithasyasa oko ndegheka yethu
---------------------	---

<p>5mins</p>	<p>Erina lyayi ningye ngikere Inde natsuka erisomo lino, ngabasaba indi muyitheketheke erihulikirira kandi ekalamu n’olhupapura lhw’erisakanga kw’ebindu bikulhu bibye hakuhi. Mubane ah’eryikalha. Isimwibirirawa indi ambi ahakathikathi kenyi ihasighalha omwanya. Ngalengekanaya hathya mwamabiriyithekatheka. ABATHENDEKWA MWABUKIRE?</p>
<p>Eridara 1 Dakika 5</p>	<p>Munabwire thukayasoma oko malhwere awakasa omonda kandi inianganasighalira oghundi mudi. Bulhaya munywani wawu nganalyathowa oko mwatsi oyu. Amalhwere akalhwa oko mudi neryo iniahamba oghundi akahulhawa mw’amalhwere awakasighalira.</p> <p>Amalhwere aya anganahamba ekyitsweka kyoosikyosi ekyiri oko omübiri w’omundi ng’okw’ omübiri kw’eyihya, amalha kutse ebindi bitsweka bw’omübiri.</p> <p>Amalhwere amanene awakasa omonda kandi inianganasighalira akaaletha erituruka.</p>
<p>STEP 2: 7mins Eridara 2: Dakika 7</p>	<p>Bulhaya eyawikere nayo eribugha amalhwere awakaaletha erituruka ng’akaminyikalhu k’obulhwere. Hathya mubisakange.</p> <p>Muleke ngabahereraya eby’erilhangirirako: ekolera, akasinini n’omutsutsa w’ebyenda. Mulebaya erisubamo lyenyu. Musubemu ingabugha esyonzakano esiri omo binywa ebi:</p> <p>E-K-O-L-E-R-A = ekolera</p> <p>A-K-A-S-I-N-I-N-I = akasinini</p> <p>O-M-U-TS-U-TS-A = omutsutsa</p> <p>Mwamathoka</p>
<p>Eridara 3: Dakika 10</p>	<p>Imaya ekyitabu kyawu n’ekalamu wusakange ekyibulyo kyinu</p> <ol style="list-style-type: none"> I. Erituruka ni kyi? II. Akahuka akakaaletha olhaturuko kakalhaba omo kyitsweka kyahi oko mubiri wethu kakathwingiramo?

	<p>Wubike omubiri wawu kandi ambi iwibuka erisyahererya w’omukangirirya etamu eyikasa angasyakeberaghu.</p> <p>Wasingya erihulikirira.</p>
<p>Omwatsi mukulhu Dakika 3</p>	<p>Ingaghunzerera erisomo lyethu, nganza eribibukya indi obuli ndambi Muyirinde oko malhwere. Mwibuke eriyirinda lisingire erithambirwa neryo thuyirinde amalhwere butsira akathuhamba.</p> <p>WUNABE OKO BYALHA NDEKE OMO SABBUNI N’AMAGHETSE BULI NDAMBI. OMUBIRI WAWU IKALE INIANAHENIRYE</p> <p>WUBYE EKA WIKALE IWUNE NDEKE BUKYAYI</p>

EBITHUTHIMBIREKO N’EMIBERE Y’OBUTHUKU (*Our environment and weather*)

EBIKAKOLHA OBUTHUKU N’EMIRINGU Y’OBUTHUKU (Types of weather)

Endambi: Dakika 25

<p>Eby'eritsuka nabyo Dakika 2</p>	<p>Wabukire mwanithu muthendekwa! Wasingya erihulikirira erisomo lino erilhaba oko rediyo</p> <p>Erina lyayi n'ingye Thuthalithwatsuka, ngasaba indi thuyithegheke erihulikirira. Wimaye ekalamu y'erikalha kutse ey'obwino n'ekyitabu kutse olhupapura lhw'erisakangako. Wubane ah'eryikalha. Isiwikalha hakuhi n'oghundi mundu. Ngalengekanaya wamabiriyithegheka.</p> <p>Ni Kyibuya</p>
<p>Eridara 1: Dakika 10</p>	<p>Munabwire thukayasoma, eribugha esyonzakano esiri omo binywa kandi thukendisakanga. Thuthali thwakolha ebyo, thukayimba akasimu.</p> <p>Eritsuka, ngendyimba ingyuwene, neryo nenyu mukendyimba nayi. Hathya muhulikirire.</p> <p style="padding-left: 40px;">Mbulha, mbulha, wughende Wusyasa ekyindi kyiro Abana bakasatha Banzire omwisi akole Mbulha, mbulha, wughende</p> <p style="padding-left: 40px;">Ngabasaba muhangane thwangimba haghuma Mwasingya</p> <p>Abathendekwa, hathya thukayasoma ebinywa bino, musubemo ingaghunza erisoma ekyinywa.</p> <p>omwisi erighenda ebithu omuyagha embulha</p>
<p>Eridara 2 Dakika 8</p>	<p>Thusome haghuma ebinywa ebi.</p> <p>embulha ebithu omuyagha omwisi eryuba ekyihihi</p>

	<p>Mwasingya erisoma Thusubemu Abana babuya</p>
<p>Eridara 3: Dakika 5</p>	<p>Abathendekwa hathya mwanganasoma esyonzakano esikolire ebinywa esyangayabugha</p> <p>embulha ebithu omuyagha eryuba</p> <p>Hathya mwimaye ebitabu byenyu n’esyokalamu. Musakange ebinywa ngokungahulha esyonzakanu esibikolire.</p> <p>embulha ebithu omuyagha omwisi eryuba ekyihihi olhühohe erihünga</p> <p>Thusome ebinywa haghuma Kyamuwana</p>
<p>Eridara 4: Dakika 3</p>	<p>Abathendekwa munyihulikire, ngayabugha esyonzakano neryo thukendikolha mw’ebinywa.</p> <p>mbu e lha. Ekyinywa ni embulha</p> <p>Thukysisakange ndeke thu e bi, si o mwi, ba e ryu</p>
<p>Omwatsi mukulhu Dakika 2</p>	<p>Mwasingya erihulikirira n’erikwama erisomo. Isimwibirirawa erinaba oko byalha obuli ndambi yosi omo sabbuni n’amaghetse. Isimwahambahamba oko mesu, enindu n’obunu omo byalha ebithanabire.</p> <p>Mwikale eka isimwabya ahali abandu banene Ambi akahuka k’ekorona isikabahika kwa hakuhi. BUKYAYI</p>

EBIKAKOLHA OBUTHUKU N'EMIRINGU Y'OBUTHUKU (Types of weather)

Endambi: Dakika 25

Erisoma

<p>Eky'eritsuka nakyo Dakika 2</p>	<p>Kuthi abathendekwa, mwasingya eryasa oko ndegheka eno. Mwabukire Erina lyayi ningye Thuthethwatsuka erisomo, ngabasaba muyitheketheke erihulikirira. Wubane ah'eryikalha. Ambi isiwikalha hakuhi n'oghundi mundu. Ngalengekanaya mwamabiriyithegheka.</p>
<p>Eridara 1: Dakika 10</p>	<p>Munabwire thukayigha oko bindu ebikakolha obuthuku n'emibere muthina-muthina y'obuthuku. Thukatsuka eryimba akimbo kakuhi. Thwimbe haghuma. Mbulha, mbulha, wughende Wusyasa ekyindi kyi Abana bakasatha Banzire omwisi akole Mbulha, mbulha, wughende Hathya muhangane musamalire oko lhubulha. Mwamalhangira kyi? Thwamalhangira eryuba, ebithu, Omuyagha anemuhitha? Musamalire emithi. Ebithi binemudingadinga? Embulha yinemuwa?</p>
<p>Eridara 2 Dakika 8</p>	<p>Abathendekwa, ebikakolha obuthuku muli: eryuba ebithu omuyagha omwisi ekyihithi embulha Musube omo ebyangabugha Mwasingya</p>

	<p>Thuthasyimba akimbo kethu</p> <p>Mbulha, mbulha, wughende</p> <p>Wusyasa ekyindi kyiro</p> <p>Abana bakasatha</p> <p>Banzire omwisi akole</p> <p>Mbulha, mbulha, wughende</p> <p>Mwamakolha ndeke!</p>
<p>Eridara 3:</p> <p>Dakika 5</p>	<p>Obuthuku buli buthi ewenyu eyo?</p> <p>Embulha yinemuwa, ebithu bine oko lhubulha kutse yiri omuyagha?</p> <p>Hano ahangali, yiri</p> <p>Abathendekwa emithina y'obuthuku muli:</p> <p>Obuthuku bw'embulha omulhumbi</p> <p>Omwisi omuyagha</p>
<p>Eridara 4:</p> <p>Dakika 3</p>	<p>Hathya abathendekwa,</p> <p>Ithwe abosi haghuma thubughe ebindu ebikakolha obuthuku ebyathwamabirilhangira.</p> <p>Eryuba, omuyagha, ebithu, embulha</p> <p>Mwasingya</p> <p>Ithwe abosi haghuma thubughe emithina y'obuthuku</p> <p>Omulhumbi, omwisi, obuthu bw'embulha</p> <p>Mwasingya kutsibu</p>
<p>Omwatsi mukulhu</p> <p>Dakika 2</p>	<p>Mwasingya erihulikirira n'erikwama erisomo. Isimwibirirawa erinaba oko byalha obuli ndambi yosi omo sabbuni n'amaghetse. Isimwahambahamba oko mesu, enindu n'obunu omo byalha ebithanabire.</p> <p>Mwikale eka isimwabya ahali abandu banene</p>

	Ambi akahuka k'ekorona isikabahika kwa hakuhi. BUKYAYI
--	---

EBIKAKOLHA OBUTHUKU N'EMIRINGU Y'OBUTHUKU (Elements and Types of weather)

Endambi: Dakika 25

Erighanza

<p>Ekyeritsuka nakyo Dakika 2</p>	<p>Kuthi abathendekwa, mwasingya eryasa oko ndegheka eno. Mwabukire Erina lyayi ningye Thuthethwatsuka erisomo, ngabasaba muyitheketheke erihulikirira. Wubane ah'eryikalha. Ambi isiwikalha hakuhi n'oghundi mundu. Wuhambe ekalamu, ehithi hy'erighanza n'ekyitabu Ngalengekanaya mwamabiriyithegheka.</p>
<p>Eridara 1: Dakika 10</p>	<p>Munabwire thukayigha erighanza. Thutsuke eryimba akimbo kanu. Wuyithegheke eryimba haghuma nayi. Omulingu mughuma w'obuthuku Emiringu ibiri y'obuthuku Emiringu isathu y'obuthuku Emiringu ini y'obuthuku Obwosi ni buthuku bwethu obuwene</p> <p>Abathendekwa, ni miringu mingahi ey'obuthuku eyiri omo Ihwimbo?</p> <p>Thuthasyimba. Hathya thusube omo kyibulyo.</p>

	<p>Thuthasyabara emiringu y’obuthuku; Mughuma, ibiri, isathu, ini. Ni miringu ini y’obuthuku Kyuwene, thuyibbandire omo byalha.</p>
<p>Eridara 2 Dakika 8</p>	<p>Hathya thukayaghanza esyonamba erilhwa 1 erihika 40. Thuthethwaghanza, thutsuke eribugha akasimu akakakanaya okwighanza Akasanwa kaghuma Akasanwa kaghuma Akasanwa kaghuma Bbanda, bbanda, bbanda omo byalha 2, 3, 3 1 2 3 4 5 6 7 834 35 36 37 38 39 40. Hathya thwimaye ehithi hyethu hyerighanza neryo thughanze erihika oku 40. Abathendekwa mwasingya</p>
<p>Eridara 3: Dakika 5</p>	<p>Ngokuthwamabirighunza eribara esyonamba syethu erilhwa oku 1 erihika oku 40, thwimaye ebitabu byethu n’esyokalamu. Wulikirira wanasakanga esyonamba thukasibugha. 1 2 3 4 5 6 7 8 9 10 11 12 13 14 15 16 17 18 19 20 31 32 33 34 35 36 37 38 39 40 Ngalengekanaya wamabirighunza KYUWENE</p>
<p>Eridara 4: Dakika 3</p>	<p>Hathya abathendekwa babuya, ngalengekanaya ithwebosi thunawithe eka y’emisweta, esyogyaketi, esyosapeho n’esyomavule Thwamabya thuwithe esyomavule mukagha neryo thukongera kw’esyomavule ibiri, ni syomavule singahi esyathuwithe esyosi haghuma? Thubare ithunemongerako. Erisubamo erihikire ni syomavule munani. Kyuwene.</p>
<p>Omwatsi mukulhu</p>	<p>Mwasingya erihulikirira n’erikwama erisomo.</p>

Dakika 2	<p>Munabe oko byalha n'esabbuni n'amaghetse.</p> <p>Mubye eka kandi ambi isimwahika ahali abandu banene.</p> <p>Mwikale isimuwithe butsubu</p> <p>BUKYAYI</p>
-----------------	---

EMIBIRI EYIKAKOLHAWA OMO BIRIMO MUTHINA MUTHINA

(Activities for different seasons)

Erisoma

Obuthuku: Dakika 30

<p>Eky'eritsuka nakyo</p> <p>Dakika 2</p>	<p>Kuthi bahulikiri, mwasingya erihulikirira erisomo lino erilhaba oko rediyo Mwabukire. Erina lyayi n'ingye Thuthalithwatsuka, ngasaba indi thuyithegheke erihulikirira. Wimaye ekalamu y'erikalha kutse ey'obwino n'ekyitabu kutse olhupapura lhw'erisakangako. Wubane ah'eryikalha. Isiwikalha hakuhi n'oghundi mundu. Ngalengekanaya wamabiriyithegheka.</p> <p>Ni Kyibuya</p>
<p>Eridara 1:</p> <p>Dakika 10</p>	<p>Munabwire thukayasoma oko mibiri eyikakolha omo birimu muthina-muthina.</p> <p>Abathendekwa muhulikirire omughane oyu.</p> <p>Erina lyayi ningye Bira. Ngikere eBwera. Abandu banene abahughu bayi abanene ni balimi. Bakakolha emibiri enu omo buthuku bw'embulha: bakahera ebirimwa, bakasesa omwirima mw'ebithi, bakasekera, bakakolera n'erikulhanga ebirimwa ebithuwene. Omo buthuku bw'omwisi, bakalima, bakasolhoma kutse erihulhulha ebirimwa kandi ibumya ebirimwa byabu.</p>
<p>Step 2:</p> <p>~8mins</p>	<p>Obo emibiri eyathukasomako muli:</p> <p>Erihera, erisesa ebithi omwirima, erisekera, erikolera</p> <p>Erisolhoma, erisombolha embuthu, eririma, eryumya</p>

	<p>Musube omo mibiri eyi ingabughayo:</p> <p>erihera, erisesa ebithi omwirima, erisekera, erikolera, erisolhoma, erisombolha embuthu, eririma, eryumya</p> <p>Thuthasyabibugha</p> <p>Mwamakolha ndeke</p>
<p>Eridara 3:</p> <p>Dakika 3</p>	<p>Hathya mwahule esyonzakanu esiri omo binywa ebi imunanyikwamire</p> <p>Erihera Erisesa</p> <p>Erisekera Erikolera</p> <p>Erisolhoma Erisombolha</p> <p>Mwamuwania</p> <p>Hathya mwimaye ebitabu byenyu mwangasakanga ebinywa ebyangayabugha</p> <p>Erisolhoma Erihera</p> <p>Erisombolha Erisekera</p> <p>Erikolera</p> <p>Mwamuwania</p>
<p>Eridara 4:</p> <p>Dakika 3</p>	<p>Abana, thusube omo mibiri eyikakolhawa omo buthu bw'embulha;</p> <p>Erihera, erisesa, erisekera, erikolera.</p> <p>Thuthasyasuba omo mibiri eyikakolhawa omo buthuku bw'omwisi</p> <p>Erisolhoma, erisombolha, eririma, eryumia</p> <p>Mwasingya!</p>
<p>Key message</p> <p>~2 mins</p>	<p>Mwasingya erihulikirira n'erikwama erisomo.</p> <p>Munabe oko byalha n'esabbuni n'amaghetse.</p> <p>Isimwahambahamba oko mesu, enindu n'obunu omo byalha ebithanabire.</p> <p>Mubyekanda kandi ambi isimwahika ahali abandu banene.</p> <p>Mwikale isimuwithe butsubu</p> <p>BUKYAYI</p>

EMIBIRI EYIKAKOLHAWA OMO BIRIMO MUTHINA-MUTHINA

Endambi: Dakika 30

Erisakanga

<p>Ekyeritsuka nakyo Dakika 2</p>	<p>Wabukire mwanithu muthendekwa! Wasingya erihulikirira erisomo lino erilhaba oko rediyo</p> <p>Erina lyayi n'ingye Thuthalithwatsuka, ngasaba indi thuyithegheke erihulikirira. Wimaye ekalamu y'erikalha kutse ey'obwino n'ekyitabu kutse olhupapura lhw'erisakangako. Wubane ah'eryikalha. Isiwikalha hakuhi n'oghundi mundu. Ngalengekanaya wamabiriyithegheka.</p> <p>Ni Kyibuya</p>
<p>Step 1: ~5 minutes</p>	<p>Munabwire thukayigha oko mibiri eyikakolhawa omo birimo muthina-muthina.</p> <p>Ekyerimbere wuyitheketheke kandi wuhulikirire ebinywa ebyangayabugha.</p> <p>Erisolhoma erisesa Eryuthangirira erisekera Erihera eririma Eryumia erikolera Erihumba</p> <p>Hathya thuthasyabibugha</p> <p>Erisolhoma erisesa Eryuthangirira erisekera Erihera eririma Eryumia erikolera Erihumba</p>
<p>Step 2: ~10 minutes</p>	<p>Abiyi thubughe ebinywa ithunemubisakanga.</p> <p>Erisolhoma erisesa eryuthangirira, erisekera, errihera, eririma, eryumia, erikolera, erihumba</p> <p>Thuthasyabibugha</p> <p>Mwamakolha ndeke</p>

<p>Eridara 3 Dakika 8</p>	<p>Hathya musakange emilhondo eyangayasoma Thatha akasolhoma ebikusa. Maliya akasekera ebihimba. Yoweri akahera omuhemba. Mama akasesa esyonyanya.</p> <p>Kyuwene</p>
<p>Eridara 4: Dakika 3</p>	<p>Abathendekwa, thuthasoma emilhondo. Thatha akasolhoma ebikusa. Maliya akasekera ebihimba. Yoweri akahera omuhemba. Mama akasesa esyonyanya</p> <p>Mwamakolha ndeke!</p>
<p>Key message ~2 mins</p>	<p>Mwasingya erihulikirira n'erikwama erisomo. Munabe oko byalha n'esabbuni n'amaghetse. Isimwahambahamba oko mesu, enindu n'obunu omo byalha ebithanabire. Mubye eka kandi ambi isimwahika ahali abandu banene. Mwikale isimuwithe butsubu BUKYAYI</p>

EMIBIRI EYIKAKOLHAWA OMO BIRIMO MUTHINA-MUTHINA

Obuthuku: Dakika 30:

ERIGHANZA

<p>Introduction ~2mins</p>	<p>Wabukire mwanithu muthendekwa! Wasingya erihulikirira erisomo lino erilhaba oko rediyo</p> <p>Erina lyayi n'ingye Thuthalithwatsuka, ngasaba indi thuyithegheke erihulikirira. Wimaye ekalamu y'erikalha kutse ey'obwino n'ekyitabu kutse olhupapura lhw'erisakangako. Wubane ah'eryikalha. Isiwikalha hakuhi n'oghundi mundu. Ngalengekanaya wamabiriyithegheka.</p> <p>Ni Kyibuya</p>
<p>Eridara 1 Dakika 8</p>	<p>Munabwire thukayigha oko bindu ebikaghenda haghuma (esyosethi)</p> <p>Thuthethwatsuka, ngabasaba muhangane.</p> <p>Abathendekwa muhangane thwangimba akimbo</p> <p>Ekyimbata kyinemutsigha omo maghetse</p> <p>Ekyimbata kyinemutsigha omo maghetse</p> <p>Ekyimbata kyinemutsigha omo maghetse</p> <p>Kyighuma kyikatsigha, kyikatsiha, tsiha</p> <p>2,3,4,5</p> <p>Abathendekwa, thukanalhangira indi thuwithe ebirimo bibiri omo mwaka.</p> <p>Thuthabibugh.</p> <ol style="list-style-type: none"> 1. Ekyirimo ky'embulha 2. Ekyirimo ky'omwisi. 3. Thukayabugha emibiri 5 eyikakolhawa n'abalimi omo buthuku bw'embulha <p>erihera erisekera erisesa erikolera erifuhirira</p> <p>Abathendekwa eyo ni mibiri ithanu</p> <p>Thukathasyaghanza ithunemubugha</p> <p>1----- 3----- 5----- 2----- 4-----</p> <p>Abathendekwa, thukayasakanga esyonamba 1----- 5</p> <p>Ngayabugha imunemusakanga.</p> <p>Muhulikirire: 1,2,3,4,5</p>
<p>Eridara 2</p>	<p>Thukayigha erikolha emithondo.</p>

	<p>omuthondo ni bindu ebithondire haghuma. Ekyerilhangirirako, wamatheka esyokalamu 5 haghuma, wukabya iwamakolha omuthondo w'esyokalamu.</p> <p>Abathendekwa, ngalengekanaya mukyininibukire akimbo kanu Akasanwa kaghuma x3 Bbanda bbanda bbanda omo byalha Ehisnwa hibiri Bbanda, bbanda bbanda omo byalha 3, 4,5 Mwamakolha ndeke, mwasingya!</p>
<p>Eridara 3 Dakika 5</p>	<p>Hathya thukole emithondo haghuma. Imaya ehikuningiru hithanu hy'esyotsupa Thubare: 1,2,3,4,5 Ehikuningiro hithanu Thuhitheke haghuma Oyo ni muthondo w'ehikuningiro Omo muthondo muli ehikuningiro hithano</p> <p>Imaya esyonguma 7, Thubare; 1,2,3,4,5,6,7. Ni muthondo w'esyonguma Omo muthondo muli esyonguma 7 Eeeee!!!! Thwamabirikolha emithondo</p>
<p>Eridara 4 Dakika 3</p>	<p>Abathendekwa mubughe muthi ekyithe mwakyi Musubemu- ekyithe mwakyi Ekyithe mwakyi ni kyindu omuthe kyi Abiyi,</p>

	<p>Mwimaye ekyikopo ky'amaghetse. Muthule amaghetse. Hatha kyamabya isimuli kyi</p> <p>Ekyikopo simuli kyi. Ni mukongotho</p>
<p>Omwatsi mukulhu</p> <p>Dakika ibiri</p>	<p>Mwasingya erihulikirira n'erikwama erisomo.</p> <p>Munabe oko byalha n'esabbuni n'amaghetse.</p> <p>Isimwahambahamba oko mesu, enindu n'obunu omo byalha ebithanabire.</p> <p>Mubye eka kandi ambi isimwahika ahali abandu banene.</p> <p>Mwikale isimuwithe butsubu</p> <p>BUKYAYI</p>

EBYALYA N'EKYIRISYA

EMIRIRE EYUWENE

OBUTHUKU: Dakika 30

<p>Ekyeritsuka nakyo</p> <p>Dakika 2</p>	<p>Wabukire mwanithu muthendekwa! Wasingya erihulikirira erisomo lino erilhaba oko rediyo</p> <p>Erina lyayi n'ingye Thuthalithwatsuka, ngasaba indi thuyithegheke erihulikirira. Wimaye ekalamu n'ekyitabu kutse olhupapura lhw'erisakangako. Wubane ah'eryikalha. Isiwikalha hakuhi n'oghundi mundu. Wibuke erithendihika hakihi n'omundu oyuwithe ehiminyikalhu hy'obulhwere bw'ekorona omuli erikoholha, erithwa esyotshya, omubiri erihuhana.</p> <p>Ngalengekanaya wamabiriyithegheka.</p> <p>Ni Kyibuya</p>
--	--

<p>Eridara 1 Dakika 3</p>	<p>Munabwire thukayasoma oko “Emirire mibuya”</p> <p>Thukatsuka eryimba haghuma</p> <p>Wuyithegheke eryimba nayi</p> <p>Wasingya habwa ekyihughu ekyisihire</p> <p>Wasingya habwa ebiguma ebyathukalya</p> <p>Wasingya habwa ebyalya ebyathukalya</p> <p>Wasingya Nyamuhanga habwa ebyosi.</p> <p>(Use tune for Thank you God for the world so sweet)</p> <p>Hathya suba omo kyibulyo kyino.</p> <p>Eriryanda ndeke wukakiyithegherera wuthi?</p> <p>Eriryanda ndeke kyikamanyisaya eriryanda ebyalya ebiri mw’ekyirisya ndeke</p>
<p>Eridara 2 Dakika 12</p>	<p>Emirire eyuwene ni yahi?</p> <p>Ebyalya ebiri mw’ebiyithawa muthina-muthina by’ebyalya ebikahambaya emiringu muthina-muthina oko ndambi syosi.</p> <p>Ebyalya muthina- muthina ni byahi?</p> <p>Ni by’emihanda isathu</p> <p>1. Ebyalya ebikaherera akaghalha omuli: omuhoko, ebinyangwa, omukyeri, ebiribwa, obulhu, ebikusa</p> <p>2. Ebyalya ebikahimba omubiri muli: amahere, ebihimba, ebinyobwa, amathi, amaya, enyama</p> <p>3. Ebyalya ebikathulinda oko malhwere muli (i) ebiguma ng’emitsungwe, emiyembe, amapira, esyofakado, enanasi (ii) esyonyenyi omuli: ekabbegy, ekaroti, edodo</p> <p>Obo kyikamanyisaya, eriryanda eryuwene, omundu atholere inialya kyalya kyighuma oko buli muhanda w’ebyalya.</p> <p>Hathya suba omo binywa ebyangayasoma</p> <p>Ebyalya ebikaletha akaghalha</p> <p>Ebyalya ebikahimba omubiri</p> <p>Ebyalya ebikalinda omubiri oko malhwere</p> <p>Hathya sakanga ebinywa ebi</p>

	<p>Ebyalya ebikaletha akaghalha</p> <p>Ebyalya ebikahimba omübirĩ</p> <p>Ebyalya ebikalinda omübirĩ oko malhwere</p>
<p>Eridara 3</p> <p>Dakika 5</p>	<p>Ibbwa emirire mibuya yiwithe kyibuya kyahi? Kyirengekanayeko.</p> <p>Wibuke, eribya n'emirire mibuya, ebyalya ambi ibyathunga emihanda yosi isathu. Ekyi ni kyikulhu kusangwa:</p> <ul style="list-style-type: none"> • Kyikaleka omundu iniikalha inianakalire isyalilhwahwalhwalha • Kyikaleka omundu iniathunga akaghalha • Kyikaleka omundu iniakulha ndeke • Kyikaleka omundu iniakolha ndeke omo kyisomo
<p>Eridara 4</p> <p>Dakika 5</p>	<p>Hathya lengekanaya wanasuba omo bibulyo ebi.</p> <ol style="list-style-type: none"> 1 Sakanga emihanda y'ebyalya eyikakolha emirire eyuwene. 2 Sakanga ebyalya bisathu eby'omundu angalya haghuma neryo iniabya iniamabirirya ndeke 3 Emirire eyowene yiwithe kyibuya kyahi?
<p>Omubiri w'erikolha</p> <p>Dakika 1</p>	<p>Samalira ebyalya ebikaghenda haghuma. Omo buli gurupu y'ebyalya, sakanga emihanda ithanu y'ebyalya.</p> <p>Wukendisyakangania erisubamo lyawu omukangirirya oko sukuru</p>
<p>Omwatsi mukulhu</p> <p>Dakika 2</p>	<p>Ingaghunzerera erisomo lino, nganza eribibukya:</p> <p>Obuli ndambi yosi, ahakathi-kathi kenyu ihabya ihanasighere omwanya eribalinda erithendihambwa ekorona</p> <p>Munabe oko byalha ndeke omo sabbuni n'amaghetse. Ithwe bosì</p> <p>THURWANISAYE EKORONA</p>